

萬載縣志

第二冊

萬載縣志卷一之一

方輿

星野

沿革

形勢

隘塞

星紀斗牽牛也爾雅釋天斗牽牛者日月五星之所終始故謂之星

紀郭璞注白南斗十二度至須女七度為星紀於辰在丑吳越之

分野屬揚州音書天文志

舊按此以十二次言萬載當在星紀次

吳地斗分野也今之會稽九江丹陽豫章廬江廣陵六安臨淮郡

壽吳分漢書地理志南昌饒州廣信南康建昌撫州臨江吉安瑞

州袁州贛州南安天文斗分野九江斗牛分野明一統志



據此則瑞袁兩郡並斗分野乃瑞志因晉隆安水災以為大陰犯牽牛之應舊志據之遂謂萬古筠轄約在斗牛二星間誤矣筠與九江不接壤也府志云吳分長沙立安成郡晉以安成屬荊州故袁獨兼翼軫之分然宜春在漢時與建成同隸豫章固吳域也惟萍鄉當兼楚地

斗牽牛須女吳越揚州豫章入斗十度晉書天文志 斗六星二十五度吳分野南康臨江袁州南安入斗四度安志 北方南斗六星南星者魁星也北星杓也石申曰魁第一二王吳三一會稽三丹陽四豫章五廬江六九江

據此則以南斗言之萬載當占第四星

春秋緯文耀鉤云蒙山以東至南江會稽震澤徐揚之州屬權星賈彥周官正義 北斗第四星曰權於時主水其分為吳宋史天文志

此以九州屬北斗也星有七州有九竟青徐揚并屬故也萬載故隸揚當屬權星

吳楚之疆候在熒惑占於鳥衡史記天官書 星經曰熒惑主霍山揚州荊州交州又曰辰星主斗牛女虛危室壁後漢書天文志注 按此以五星言之萬載次當辰星占熒惑

又按歷代所占豫章應斗者十之六五應牛者十之二三翼軫無之袁州之占屢驗於斗如梁大同五年彗出南斗占應劉敬

躬陳天嘉四年太白入南斗占應安成王宋乾道二年月入斗  
又犯權星占應夏皇后至正十一年太陰犯斗宿距星大白犯  
斗西第二星占應徐壽輝確鑿可據今惟以南斗中之第四星  
爲主而北斗之權星及五曜之惑星以次附焉

夏禹宅九州屬揚州商祖甲二十八祀屬吳

史記世家泰伯之荆蠻自號句吳

周元王四年越滅吳屬越

世家正義袁吉虔撫歙宣並越西境

顯王三十六年楚威王滅吳屬楚秦始皇二十六年分天下爲三  
十六郡屬九江郡漢高祖六年置建成縣隸豫章郡

漢書地理志豫章郡領縣十八其十二曰建成注蜀水東至南  
昌入湖此縣地爲建成之證

新莽改名多聚縣隸九江郡

地理志注豫章郡莽曰九江建成莽曰多聚

東漢世祖建武元年復名建成隸豫章郡 靈帝中平年置上蔡  
縣年上疑闕一字新註

舊按上蔡縣郡國志注中平年立太平寰宇記後漢靈帝析建  
成置孫吳增置陽樂宜豐二縣晉武帝大康元年上蔡改名望  
蔡因改陽樂爲康樂又云豐城縣此蓋宜豐之訛 吳大帝自上  
蔡縣分置陽樂縣吳大帝於上蔡縣分置廣興記上高晉望蔡

新昌吳宜豐萬載吳陽樂據此則陽樂宜豐俱上蔡分地雖上  
高新高昌東境割隸莫考而陽樂未置縣時萬境固全隸上蔡也  
孫吳大帝黃武中置陽樂縣 晉武帝大康元年改名康樂縣  
惠帝元康元年割屬江州都督 隋文帝開皇九年并入建成縣  
隸洪州總管府 煬帝大業二年仍隸豫章郡  
是年廢總管仍爲郡

唐高祖武德五年復置陽樂隸靖州 七年隸筠州 八年并入  
高安屬洪州都督府

舊按寰宇記七年改靖州爲樂州又爲筠州

太宗貞觀元年屬江南道 元宗開元二十一年分屬江南西道

懿宗咸通六年屬鎮南軍

舊按唐志是年五月以江南西道置鎮南軍於洪州改觀察使  
爲節度使

哀宗天祐三年屬楊吳楊吳天祐間置萬載塲

舊按吳王分高安之萬載鄉置萬載塲因鄉以名塲萬載之名  
昉此舊志年代舛誤訂正

順義元年置萬載縣

舊按安志李守郡志是年分高安四鄉寰宇記進城康樂高侯萬載  
置萬載縣立縣實昉此

南唐保大十年割隸筠州

舊按安志李志是年升高安爲筠州遂以萬載爲筠屬邑又按寰宇記萬載縣去州一百里舊五鄉今四鄉本高安縣地僞吳順義元年分高安進城康樂高侯四鄉置萬載場因其鄉以名其地僞唐保大十年升高安縣爲筠州遂升萬載場爲縣以屬焉據此則屬筠之日始升場爲縣也攷五代史職方攷云筠州南唐李璟置割洪州之高安上高萬載清江四縣爲屬而治高安南唐世家云保大十年分洪州之高安清江萬載上高四縣地置筠州夫曰割縣爲屬分縣置州則萬載屬洪時已爲縣明矣十國春秋云南唐保大十年正月復置筠州於高安領縣四附注云楊吳置萬載屬洪州一本說作袁南唐時來屬筠州則與安志

李志順義元年置縣文合置場應在順義前升縣卽在割鄉時樂氏誤以割鄉爲置場耳攷升場爲縣不獨萬載如靖安上高德興安仁鉛山上猶龍南石城金谿皆是當置場之始惟聞析地立場未聞割數鄉屬之者惟金谿場嘗并白馬一鄉此殆因場地附近或阡治所必資若萬載場置於萬載鄉自有鐵山且僻在凶境西豈能遠馭四鄉然則四鄉之分實立縣非置場也徐昇修縣志亦踵其謬今叅攷史書斷從安志李志云

宋太祖開寶八年隸袁州爲繁縣 徽宗宣和三年更名建成縣

高宗紹興元年復名萬載縣

元世祖至元十九年隸袁州路元地理志

明大祖二年隸袁州府 郡李志及清江志大祖於元至正二十二年春平江西二十四年改袁州路爲府

清因之編戶一百四里

民國元年廢州郡留縣萬載爲八十一縣之一民國八年行四道制隸屬廬陵道道尹公署設吉安董錫成爲道尹北平人十一年換劉印昌河間人下半年換孟葆靈山東人十二年換杜錫冰河南人十四年換盧建侯宜豐人十五年革命軍至取消道制十八年劃分八行政區制隸第二行政區萍鄉人危宿鍾爲行政長官二十年後改爲第二區行政督察專員二十一年改黨政委員會委員長兼縣長二十二年仍爲專員并後增兩縣共轄十一縣

在吳之頭楚之尾山高水清禾穀豐碩宋羅誘傳信錄序

地勢隱然負山帶江徐昇縣治記

山水清隩風氣厚密歐陽元緒修記

其地山多田少河道縈窄灘險石峻艱於輸運嘉靖志

萬載當郡北更北則寧州境東上高西瀏陽鵝鶴諸峯障之郭子章

郡邑表說

萬巖邑也其山峯崒而嵯峨其水縈紆而綠波袁業泗萬載志序

袁州地逼長沙逋民客戶頗難稽察潛確類書引桂夢語

倚官山環龍河筆架盤旋虹橋轟起彭天補學記

康樂邑萬山中四顧巉巖峯粵兩河直貫城市鍾煇城垣記

上通潭鄂下達筠洪南抵臨吉晉宜勉浮橋記

鷓峯鶴嶺左右屹立月臺紫蓋前後橫陳王子音今古地理述

天馬南來太陽北峙浮樓聳秀於東郊卓筆凌雲於西鄙鳥溪竹  
洞流匯城心錦水蜀江波環治後作西江之屏障扼南楚之咽喉  
鐵山界在縣西一百二十里西連瀏陽南通萍鄉醴陵毗鄰三關  
九畚爲正西要道前代賊寇侵掠多由此入境明時設巡檢司置  
弓兵於此與黃圃安樂梅園各司互爲聲援  
界嶺在縣西北一百二十里爲通楚孔道西接旂焰大綱東北連  
九龍層峯邃谷湖湘有事則此地爲西北鎖鑰東有演武廳蓋前  
朝扼要防守處也今設汛置兵以時稽察

三界尖在縣西北一百三十里以北界義寧西界瀏陽得名與鄧  
公嶺相連數十里祖谷層峯鳥道一髮爲西北隘口攻守者所必  
爭

天井窰在縣西北一百二十里環窩數十里皆峻山西達瀏陽北  
界義寧惟金鈎嶺阿彌陀佛嶺有大小二道可通往來窩口三關  
天險壁立明時巨盜李大鑿楊青山麻棚邱仰寶盧南陽均嘯聚  
其中大爲害宋元豐中設巡檢司於高村明萬曆初改立黎源  
哨

太陽山在縣北一百三十里北界義寧東鄰新昌黃蘗之首峯也  
與天井窰黃岡洞東西相通其石磴千級者爲銅鼓營之捷徑宵



小多出沒於此

舊按邑治偏東南隅宜春上高接壤平曠無由伏莽惟西北崇  
山峻嶺與楚爲鄰深林密箐最易藏奸舊志不錄隘寨陳志列  
武備志內載有鄆玉寨黎源哨雞籠營房今惟黎源哨存餘詳  
古蹟兵衛志

毗連縣名仍舊不改免致參差如修水銅鼓宜豐善讀者自能  
知之八月病起記

萬載縣志卷一之二

方輿

山川總括分紀

萬載山縣也以山多之故而利常厚亦卽以山多之故而害常深  
利害之相乘治亂所由積也當其亂也山居之民自內之外欲不  
輕棄故土而不得凡此皆願懲馴良易與爲治而不肯與爲亂者  
其或不夫則自以爲貧困之極於我無害抑或欲乘機以圖利有  
桀黠者出而煽惑之愚弄之而其害遂致於不可收拾明清遞嬗  
李大變朱益吾等輩之紛然起也焚掠劫殺被殘賊者十數縣及  
乎蕩平山山幾人烟絕迹矣清代乘方張之氣地方得良有司懷

來招攜遠方之人又自外而之內勞苦種作聚落以成而生齒日滋蓋平定又數十百年於今矣其間因而致富者如高村之張仙源之王未易悉數其間接者更無論也天之方蹶亂之又生十八九年之間相與煽惑而愚弄者患氣積於中而大亂延於外焚掠劫殺不知其幾百千萬戶近粗安矣而伏莽未淨也先事之圖履霜之懼蓋俯仰羣山萬壑而不勝長慮卻顧之亟也

豫章之西五百餘里介吳楚之交羣山連亘爲南次大幹其脈自南而北朱子所謂一支由袁筠而至廬阜者是也萬載諸山皆隨南幹分出遠脉自滇黔南楚至萍鄉之羅霄山斷以宜春古神尖爲近祖其北出者卽大幹東出者爲分幹自古神尖東行三十餘

里入縣境爲東臺山爲亂石嶺爲鳳凰臺十餘里至大窩裏左分支西北行至小嶺西行爲朱嵐尖東行爲大關嶺盡於潭埠分幹自大窩裏東行十餘里起湯周山分條四北條爲鴿子峯逆上爲鄒玉寨爲東岡尖北降起菰嶺分支三一西至羅家寨西盡潭埠東盡浩石一北行右帶蘇溪西盡水南東盡破田一東行左帶梅源爲五神嶺爲山田嶺右帶桃源爲豬婆嶺爲戴公尖盡於人形山與官莊相望南條入宜春境爲如同寨西條爲九峯山東條起煉魔塲傍東庵降爲風門坳復起爲橫山北分支經大唐諸山盡於高城

分幹承湯周山東條正脉南起馬腦寨東轉長垣山卽牛婆嶺鶴

嶺也北分支由裏壑起香爐山盡於竹渡正支東北行降伏起望  
府樓左右分爲二支左支北踰穩山關又北起木星腦盡於仙遊  
嶺右支東北迤邐十里入縣城起龍山

分幹自馬腦寨南東行左抱虹霓院十餘里東起大原山左分支  
東北行二十餘里盡於兩河山橋分幹東南行左分支起白沙嶺  
一名龍潭三山盡於田北分幹東行左分支起天馬山其北爲銀  
山寨爲黃田爲馬步爲五里牌盡於楷樹江

分幹入宜春境降伏爲西嶺鋪東起圓嶺二十餘里左分支北行  
由南唐坳石灰嶺入縣境起仙姑嶺南分支起伏爲屏山盡於郭  
村北分支八里爲牙梳山降伏起雞籠山西北行五里至城南起

月臺山入城盡於花園裏仙姑嶺東北行左抱東岐東起浮樓嶺  
降爲畫閣山人上高境浮樓東肩出支二一由櫟頭山東入上高  
境北盡於湖潭一由煙塘左帶一都墩逆上十餘里盡於塗陂浮  
樓西肩降下起鴉鼻峯其北稍降右披支起小鵝峯盡於石灰嶺  
左支降下西北行爲茶山腦分爲二支一北行十餘里踰長步亭  
東起玉屏山盡於塗口一西北行降爲平坡先入東城再散爲墩  
阜踰厰塘逆起梧桐岡入北城盡於虹橋之東此自西而南而東分  
幹諸支之散在縣境者

大幹自古神尖北行二十餘里降伏爲虎爬泉稍西爲太平關又  
北起幽蘭山入縣境爲鐵山分支東行爲懶人寨爲石嶺巖三十

里爲翁歸山爲石塘爲楮樹潭盡於唐家莊按台嶺巖在邑西八十里半莖有洞深進數丈夏可避暑冬可禦寒上有石樓若大匠削成

大幹自鐵山北行二十里爲大綱山分幹西行爲湖南省分支東南行爲七眉嶺迤邐盡於濠田潭埠

大幹自大綱山北東行十里爲旗焰山二十里爲龍界山爲陽洞嶺東分支爲天明山東南盡於桑田南面降下踰斜坡嶺起大皇山又南爲卓筆尖東轉爲炎皇聚卓筆尖南行爲白水嶺降下東轉爲烏尖分散盡於潭埠狗腦石大廟大皇山東出數里起書堂山東南踰窪裏十里爲落索冲分爲二一盡紹江一由栗樹坳西盡柵上東盡鈴田大幹自陽洞嶺北行八里爲青山頭東分支十

里爲神嶺寨轉東南行十里爲望峯樓降下爲神仙坳五里爲四  
十里山十里爲石庵南行八里爲蚺蛇洞其山東西橫列西稍上  
盡於鈴田東降下踰沙路冲起陰院嶺亦東西橫列西經瓦宅盡  
於車上東經黃花步盡於官莊獅形山大幹自青山頭西北行六  
里東降爲界嶺在瀏陽孔道又東北行起九龍山二十里爲鄧公  
嶺東分支由英公嶺至抱古嶺南分支二十里爲三爪嶺又南盡  
於雙江口抱古嶺東行十五里起黃皮尖其北肩東盡於高嶺水  
口其南肩南盡於東江水口東面降下山半爲打鐵坳又東南屈  
曲十里起謝山分北南東三條北條起紗帽山轉東行十餘里盡  
於煙竹村南條逶迤十餘里至爐前壁起高低窩分支東行爲基

子寨折而南十餘里盡於冠邱山正脉西行數里亦折而南十里踰太平街南行十里爲受風山爲龍王隱又南東行十餘里右帶饒田起上藍山又南起三峯尖西轉爲馬腦嶺爲紫蓋山降下平坡盡於李家園南分支經南田盡於湖上江口正脈東行左抱范塘折北起文岡尖東降爲易公坳又東起壺仙嶺其南爲雞冠石爲英山其東迤邐十餘里爲北山餘支盡於興江口東條自土地坳東降起石峯分支東北行介煙竹岐原之間十餘里至老虎坳起峯橫列西上爲虎頭尖東下爲更古山盡於高村水口正脉自石峯東南行七里爲煙竹黃十五里爲大蕪山先五里分支南行爲老鴉窠左分支起昌湖嶺南東行二十里盡於小洲上右支南

行東帶淖源西帶下菱湖十餘里踰沙洲墮又二里左右分爲二支東行散於姑蘓臺餘支南至岳武穆故壘盡於逍遙觀右支南行十餘里經來塘步東起五雷山右帶福塘泉盡於花塘西起張公嶺右帶白良盡於煙包橋大蕪山東降爲芳阮嶺南分支爲仙壇尖東行左分支爲雲芒山又東行三里爲華蓋尖分支南行二十里爲平山頭其東爲陶逸巖又東南爲七重山爲紗帽山西南轉爲雲峯嶺紗帽山北先出支東經宗塘尾左右又分三支右支西帶鄔家坊盡於興江口之東左支散於漣裏赤陂岐山入上高境華蓋尖東行爲七星嶺北轉爲克巢寨南行降下踰甘家阮起清泉水南分支東帶漳源麻田西帶青背阮盡於杭橋清泉山

東行爲披衣山又東數里爲都判嶺又東五里散於羅城之西披衣山南行四里爲游家嶺左右分爲二支左支突兀東行五里爲大悲尖又五里北至羅城水口盡於涼傘石南盡於小水口右支東南行八里左帶雲峯嶺入上高境

大幹自鄧公嶺北行七里爲金盆架分支西行五里爲銅鼓尖轉南西行五里爲棧樹嶺轉南行八里爲郭前南與界嶺隔溪相望自金盆架東北行七里爲松光尖折而北爲絞車峽十五里爲三界尖大幹經縣境止此其東分幹出焉十五里爲天井欄山爲皇覺寺其南爲天井窩又東行經暗洞之南起霍少尖盡於船埠潭之西

分幹自天井欄東北行稍降爲金鈞嶺十餘里爲阿彌陀佛嶺黎源往銅鼓營經此十餘里爲大陽嶺南分支爲鰲花座爲棧樹嶺爲泥蕪嶺爲祖孫嶺爲穀皮尖爲九頂山爲觀鷹山二十餘里盡於船埠潭之東九頂山東降左帶陶坪八里爲黃茅嶺爲楓城棟轉南爲和神嶺東行爲小源嶺爲固山嶺爲雞公尖爲龍山右分支西行爲天湖頂盡於高村水口龍山曲折東南行二十里爲篁竹嶼又五里爲井架山八里爲雲頭尖南轉爲芙蓉山西捲爲環溪嶺東南行迤邐十餘里盡於羅城中洲分幹自大陽嶺東北行五里爲大陽山分支南行介萬載新昌之交十餘里爲溯祖坳右披支西南行爲鼓樓嶺爲漸網洲盡於嚴田水口溯祖坳左降十餘

高車泉  
里爲分水坳爲東麝山爲仙鷓山左右分爲二支左支入新昌境  
右支東南行爲虎頭尖爲三峯院折而南爲皂山又左右分爲二  
支左支東行爲香爐峯東南散入新昌境右支南行十餘里爲牛  
鬪山入上高境此又分幹諸支之散在縣境北者

東臺山府志云在縣西九十里山皆石壁峭峻舊有寺建巖中後  
廢今獲富村有水閣嶺石壁上鐫有東蒙峯三大字疑卽東臺易  
名亂石嶺在縣西九十里嶺南水入袁河嶺北水入蜀江乃由宜  
來萬分幹過峽處

靈棲巖亦名靈棲洞洪武志云在縣西八十里洞石軒敞後有石  
門可登嶺上有巖泉出其中嘉定志云中有二石一形如鍾一形  
如鼓溪水出其下灌溉甚廣前有崇勝院今廢

周公洞嘉定志云在靈棲巖東三里洞旁多奇峯怪石

石鍋通志云在縣西南九十里有三巨石柱江澣石中有泉天將  
雨雲氣自中起如炊煙然亦名鍋水潭

將軍石在縣西七十里洋源村左右皆峻嶺中有溪澗石當其中  
拔起數丈

水晶巖通志云在縣西五十里嶺東中有飛瀑瀉出如濺旱禱焉  
朱嵐尖在縣西六十五里尖秀出羣旁多奇石  
大關嶺在縣西六十里形若隘口爲江楚孔道其北高峻東西分  
二山中有深箐非土人不知爲複山也有翠竹庵當道建亭

湯周山即峯頂山在縣西四十里跨宜萬之間高十餘里首尾六十里周迴四十八面自袁河以北蜀江以南枝峯四蔓皆祖是山舊志云晉安帝時湯周二仙修道於此山上有觀觀後有花園自園而上四里許有碁盤石上至山頂有試劍石石上多題詠每寒威初霽微華積素宛若畫圖為縣八景之一曰湯周雪霽山巔西峯為白虎嶺一名九峯北峯為鴿子山西北峯為鄗王寨南峯為如同寨正脉起東峯為煉魔場南郤為風門坳有東庵在抱中即峯頂院直對武功相傳馬祖修煉於此古名月光寺

禮山舊志云在縣西三十里形如拱揖故名

金龜石嘉定志云在縣西三十里石當道旁形如龜

長垣山湯周山東下二層勢若牆垣乃牛婆嶺鶴嶺之統名白塔山與香爐山相屬在縣西十五里有明真院白將軍墓舊志云在縣東南二里許地名下岐山低而小相傳白將軍墓在焉舊有明真院巔有塔對學為文筆峯今塔廢址存是將兩處牽合為一也望府樓在縣西八里高可數里為縣治後龍山之祖其巔當東北面可望古筠州又值縣城坤方亦名坤山舊志八景之一曰坤山夕照

穩山在望府樓北嘉定志云兩山對峙中通徑路俗呼穩山関木星腦亦名鶴嶺在望府樓北十里與馬腦嶺南北隔江對峙為上鄉關鎖



仙遊巖在木星腦東北麓下瀕蜀江舊志云石高數尋可容數十  
人中有兩石色紺碧一形如鐘扣之聲清越一形類道士因稱仙  
入石今則鑿石成阮舊志載鶴嶺一名洪岡嶺在縣西南二十里  
與仙遊巖相望是因長垣山有鶴嶺誤為牽合不知木星腦亦名  
鶴嶺也  
巨囉石通志云在縣東一里荷花池東山巖側有石高數尺上有  
孔吹之若巨囉聲迴風入竅亦然今縣東一里並無石蹟當在縣  
西南荷花塘

赤硃岡舊志云在縣西一里許社稷壇左舊產土硃今竭  
龍山在縣治後其脉自湯洞長垣望府諸山迤邐至此縣署居其

麓學宮在其東誠治城之鎮山洪武志云其勢崩嵬來自衡霍不  
知衡在湖南湘水西霍在淮南江北俱不相屬  
筆架山在縣治東南二百步學前洲畔府志云屹立中流平突三

尖小石旁附狀類筆架與儒學拱對為縣八景之一曰筆架廻瀾  
古識云水打筆架穿龍江山狀元

竹山洞在縣西南二十里府志云洞非丈尺可計有水經其中為  
學前江源前後兩門內虛敞有石田石屋一石高三尺類塑像遊  
者自後洞入由前洞出禱雨輒應後五里有雲連洞亦與此洞相  
似尋其水源自宜春之虹霓阮或隱或現至小石笏水自洞中出  
即雲連洞也不數武復入洞中即後洞也穿山腹東北約四里水

又復出卽禱雨之前洞也自此流出成溪爲龍江三源之一

大原山在縣西南三十里宜春界高數里形如火燄尖秀拔翠

靈虛洞在縣西南十二里地名白洋湖

龍潭三山一名白沙嶺在縣南稍西二十里宜春界三峯尖勢若

走旗北麓有龍潭亦名龍洞

天馬山在縣南十五里兩峯對聳中有坳形如天馬騰空

靈光洞原名麝洞在縣西南十五里田北村石山之麓洞口寬丈

許內宏敞有清泉流出

銀山在縣南稍西十五里懸崖壁立石色潔白夕陽照之若銀嘉

靖載有禪定院今廢山半有洞可容數百人避寇者多就其上構

寨以居故西麓之村名曰寨下諺云銀爲載以此非謂縣境內果出銀也

牛嶺在縣南十二里蘇江冲山勢端整下有平岡狀類牛首

董洞一名觀音洞在縣南十里郭村鋪之西石山巉巖初入如斜

巷中有石若觀音

袁石宋杜綰雲林石譜云袁石距萬載縣十餘里石無數出野田

間其質嶙峋微青色間多峯巒巖竇四向又有石罅中上下生小

林木蓊鬱可喜或高三四尺或五六尺全如一大山氣勢經行凡

數百步不斷地名爲亂石里

萬石腦在縣南十五里

石灰嶺在縣南東十五里山石拳礪有洞深窾土人取石燒灰下

爲南唐劫劫背倒水入上高境舊志載爲分官界誤也嶺西北相連石城山

屏山在縣南十里整秀如屏

仙姑嶺在縣南東十五里府志云山勢矗立尖秀如髻林菁叢密有祠建山頂人多登臨

雞籠山在縣南東五里舊志云平地突起如雞籠巉石壁立下有小洞舊有營房

月臺山在縣南城外南浦橋之陽山體圓如月四旁多石如熊如罷洪武志云米穴在縣南一百五十步月臺山之陽有數巨石世傳每旦出米人取以爲常一旦有先往者遂不復出前令陶建文

昌閣今廢

鵝鼻峯在縣東十里高六七里聳拔開張如鵝展雙翅有昂首飛鳴之勢舊志云俗名鵝公鼻元虞集愛此山若蜀中鵝鼻峯因以爲名爲縣八景之一曰鵝峯聳翠

小嶺亭在縣東五里嶺高數丈建亭其巔舊志云中通徑路樵蘇絡繹爲縣八景之一曰小嶺樵歌

梧桐岡在縣北城外里許頂圓如釜四面無異態西障蜀江南拱沿城北與喬居嶠高山喜鵲稜脈絡相連東有普濟庵府志云孤特卓立龍江西繞宏敞可望重九人多登臨翠巖一名陀岡石在縣北城外百餘步今翠巖寺南有石崖依岡

蒼翠可愛舊志云石壁凌空面挹龍江巖下有穴噴泉清冽  
馬腦山府志在縣北里許山勢逆水而上若駿馬飲溪爲江山之  
勝

玉屏山在縣東北八里塗泉村口府志云秀整如屏左右有峯如  
佳人倚立屏風側

浮樓嶺在縣東十五里形若華蓋蔽障一方府志云巒岫秀麗遠  
觀若樓浮雲中通志云浮樓嶺在上高縣西一百里末山之西山  
峯秀拔下有小溪俗以其形似樓之浮水其山半屬萬載云

鐵山在縣西一百二十里乃南副大幹初經縣境之山其地產鐵  
龍成巖在縣西九十里霞峯里地名梅陂舊志云山勢聳特中有  
石室宋元祐間有獵者逐獸至其中得一獸骨其頂穹然如角識  
者謂龍蛻骨也室中有石如列仙者數十下有石鐘叩之有聲有  
石硯巖溜注之墨橫硯上筆在硯旁皆石也有石人坐白沙旁如  
鸞鹽狀或埽之復積

大綱山在縣西一百里黃茅村之西北高聳十餘里大幹自幽蘭  
山至此分幹西出爲湖南省垣此爲綱領故曰大綱分幹紐成小  
窪中有沮洳灌山田無幾卽所稱金鐘湖也

雲峯洞在大綱山東南洪武志云洞在黃茅岡上洞門闊丈餘循  
級而下則漸黑有石鐘石磬又有石如仙佛狀內有澗水產魚歲  
早禱雨輒應嘉定志云產魚亦產石燕或窮其源以辰巳入出則

日西矣

觀音巖在大綱山之麓距雲峯洞里許石類觀音下有洞虛明清泉流出

陽洞嶺在縣西一百里西通瀏陽南通白水

太皇山在縣西北六十五里高十餘里尖聳入雲洪武志云古廟嶺在縣西六十里昔人雩祭之所當卽此山按太皇山距縣城八十里六十五里者蓋指山麓而言

卓筆尖在縣西北九十里山巔尖秀如筆

觀音洞在縣西北七十里新田水口洞口舒然中闕內宏敞虛明土人祀大士於此

神嶺寨在縣西北七十五里牟源里高五里頂平如臺昔人避寇於此

望峯樓在縣西北六十里登其巔諸峰環列其下朗然在望

四十里山洪武志云以山多得名在縣西北五六十里首起排江尾止牟溪雙江口橫布數十里皆皂色石山如屯軍布壘其秀拔者如分水坳之遊螺嶼石庵之三尖峰苦竹坳之上下白郭山之將軍山皆卓如柱尖如筆府志云蜿蜒四十里盡石無土然其山麓窩內可種麻漆村落幽僻鳥道錯雜

蓮苞石在縣西北四十里牟村橋西水濱石尖突起丈餘麟峒斑駁狀如蓮苞

高車果元  
蚺蛇洞在牟村西南五里山半有洞甚深遠俗傳有大蛇死其中  
九龍山在縣西北九十里高八里東西長十五里首禪山即大爾山  
峙其後西爲界嶺演武亭東岬爲仙源村舊志云山有九峰巖峩  
秀麗常有雲覆相傳有三人修道於此道成不知所之鄉人因爲  
立祠西峰下有九龍寺乾隆間佛殿猶存東峰下有木魚寺今俱  
廢

抱古嶺在九龍山東十里其南岬爲王居洞舊志云王居洞在縣  
西八十里地名小源曾有王姓隱居其中

黃皮尖古名西峯大嶂高十八里東面形如唐帽南北翹起兩峯  
如翹橫障二十里西面如平臺北面如湧浪南面孤峯插入雲霄  
常起雲霧頂南角有堵風城舊志云在縣北八十里與謝山相對  
上有石室相傳黃皮二仙修煉於此鄉人禱雨輒應

謝山在縣北七十里高約十五里黃皮尖峙其後杉木大蕪諸峯  
帶其左碁子寨環其右絕頂數峯突兀形若樓殿巖壑競秀輿地  
廣記九域志一統志皆云以劉宋康樂公謝靈運得名不知實謝  
仲初修真之所舊有福昌院後改爲靈應觀又有段仙庵劉長者  
讀書堂

碁子寨在縣北西四十里北麓卽菱湖爲元人黃虛故里東峰有  
寨場西南爲大東山

冠邱山在縣北二十五里白良村西有石叢立秀翠玲瓏峭壁如

卷中有青陽洞天四字曾文迪墓在左岬俗名曾仙塘

金雞山在縣北三十五里舊志云山童不毛有巨石在山下遇夜金雞現

三峰尖在城北西十八里數峯尖削聯絡若旗槍森簇太和觀址在山陽鑄字猶存

獅巖在縣北五里府志云有獅子石狀類獅亦名獅子潭

石筍在縣北十五里唐南平王鍾傳宅旁筍高數丈俗呼令公石北鄉道經其下形若隘口洪武志云在鍾傳舊宅前石聳起如介冑之士爲縣八景之一曰石筍凌空

紫蓋山在縣北西十五里洪武志云山勢崇竦屹若車蓋舊名雲

蓋山一統志云仙人謝仲初嘗遊此有紫雲蓋之因名有寺踞山巔塑謝仙像爲縣八景之一曰紫蓋浮雲

壺仙嶺在縣北十五里高約五里嶺有懸崖一名釣魚臺西麓有溥泉寺卽長興寺明長史龍鐔讀書處

雞冠山在壺仙嶺南叢石現於高脊中一巨石形若雞冠上大下銳有欲墜之勢

凌雲洞一名鑿石洞舊志云在縣北十五里地名石獅裏洞在半山天陰則雲從洞口山下出因得名內虛靈高敞一溪從洞後入與竹山洞相類

東嶼石在縣北十三里懸崖壁立若巨蟾之踞山嶺左岬爲東嶼

裏兩山相夾北鄉道經其下

北山在東嶺之東山頂有石中有孔透光東爲嘯天龍有石卓立山巔高丈許謝山南條止此

紗帽山一名杉木尖在縣北七十里高可十里雄秀如層樓北與九頂諸峰隔溪相望兩山支脚交錯上有小曠名尹家嶺山陽多石中有層石上下大小不相屬高三丈搖搖欲墜名飛來石俗名和尚否謝山北條止此

更古山在縣北七十里高約四里其脉自謝山東條來十餘里東西橫列東爲更古西爲虎頭尖兩山踞高村煙竹岐源三村之中惟更古背南面北橫障高村之南其巔可望羅城北麓有兩峯東

曰寶旭西曰餞曠中有飛瀑兩疊春夏暴注水聲轟轟李榮陞更古齋在焉

虎頭尖東距更古山二里餘高相埒西抱泰溪水南麓爲煙竹

大燕山在縣北五十五里山南爲東源西源山北爲岐源高可十里三峯如筆架上有三石又名三石尖

五雷山舊志云在縣北二十里五山相聯與逍遙觀拱對鄉人禱雨於此

十八渡嶺嘉定志云在縣北四十里舊路在嶺下循環一水往來凡十八渡後人闢路嶺上俗呼十八洞非也

雲峯嶺府志云在縣北東二十五里萬歲橋之北狀如偉人



陶逸巖在縣北東三十里崑巒清潤中有石室

克巢寨在縣北東六十五里高約五六里上有寨塲相傳元時寨主劉克巢於外層護山修偽道堰水深數十丈賊至偽道逼入溪中今偽道猶存西南有豎旗尖甚險窄稍西有梳粧臺

清泉山在縣北東四十五里卽今九子磔一帶舊志云林木森苑有瀑布自山頂而下味甚清冽山形若郡之仰山又呼小仰山

大悲峰一作大丕尖在縣東北四十里府志云山勢傑特其南曲爲大悲寺元虞集有題詠

盧家石在縣東北四十里高數丈廣百餘丈形若蟠虬因近盧氏居遂以名謝山東條在縣境者止此

鄧公嶺在縣西北一百一十里明萬曆初守倫鄧子龍剿寇至此因名其山東連天井窩西接大園山皆崔巍峻拔阨襟繚繞東麓有點兵墩放馬廠打鼓嶺埋人窟皆窩寇之目

天井欄山其下爲天井窩在縣西北極僻遠處乃北分幹初出之山東南距縣城一百一十里東北距黎源二十五里距銅鼓營六十五里東距高村五十里高約十餘里東西長二十餘里其山綿亘峻削上有兩峯如夾耳中有皇覺寺久廢南爲夫井窩爲湯家洞爲白工場爲撐天石爲官鹽山爲苦菜洲其東爲鴉頸冲爲暗洞其西爲東蔗阮爲羊蔗阮爲牛皮洞爲議事亭久燬西接瀏陽北接銅鼓梅洞東連九頂山南連黃皮尖內外百餘里崇山峻谷

密菁深林天井窩尤據要害三關天險立崖如門一夫守之千人莫入李大鑿等前後聚黨其中東巢黃岡洞西巢大圍山附近州縣被害甚酷

金鉤嶺在天井欄東北其山綿亘北卽銅鼓有大道通梅洞大圍山排埠崇鄉平江等處里高村十里東山西二十里其山阿彌陀佛嶺在金鉤嶺東北嶺脊相連有路通銅鼓營路傍武功峽在縣北少西一百二十里黎源形勢險隘爲江楚要塞明鄧子龍於此破賊立功

九頂山在縣北八十里高村西北境其山崔巍蟠踞數十里以其深阻舊志失載李榮陞云九頂山北起揚巖山逶迤西南而東爲吳家山祖

孫儲泥烏嶺殼皮尖九頂山觀鷹尖黃茅嶺楓城嶺惟殼皮九頂觀鷹傑出九頂次居第六昔人稱太湖峙七十二山其中洞庭一山脩有之此山分布九嶺而九頂一山亦異九嶺以此通主九山猶七十二山之統洞庭矣高村開陽羣峭中此頂最得勢從東南溪口望之一碧靈靄如夏雲敷瓣又如海風蹙浪沓起暗空履其巔孤脊若搖四山伏氣穿辰戌而聯蒙末兩山鋪舒百十里外如湖石列地涵輝時委空遠無際繞山九泉高出率甘美可耕治居其三焉 霏玉泉石門泉尤稱勝景詳後川志 中台峯端立九頂東南其嶺平厚盡攝前山之勝左右連山怪巧森矗垣外靡然翕附眞羣峯之領袖也其下爲蒼龍臺爲龜嶼瀕於石門

陶坪在九頂山北曲徑中眾山環繞相傳晉處士陶淡隱此 中古樓在縣北七十里高村之北南與更古山相望其巔突兀五腦相連

屏風石在中古樓西邑人張明德鑄記其上

雞冠尖西距高村十里高約八里形如文筆高出山巔上可望古神幽蘭諸山其西岡脊廣厚氣勢廻環多怪石一如角高尋丈又有石如樓

天湖山在縣北七十里南與雲芒山隔溪對峙上有大小二池合流而南飛注隘口如壺濕水故湖亦作壺下有捨身磔

豬婆鬻在高村水口雲芒天湖兩山交互中北有石垠兩岬削壁數十仞如天橋闌入泰溪起嶼如蚌高數十丈溪水環繞中有石如豨故名

篁竹嶺在縣北少東七十里與克巢寨隔泰溪南北相錯其脊有大路南東通環溪嶺北通黃泥塘固山圍山九龍廟接新昌境皆重岡複嶺

井架山在篁竹嶺東五里形如障天展屏其巔眺蜀江朗然環溪嶺即芙蓉山西麓其嶺頗峻石磴數百級南沿泰溪可以關通因削壁難攻無敢觀者乾隆初年李琴若捐賞倡鑿數里遂成坦途中有環溪寺

大陽山新昌志作黃葉乃銅鼓宜豐萬載界山也在縣北一百里高可二十里舊志云未旦光先射就昏光不暝山體敦厚巨石星布中爲燈蓋窠有清泉降下深谷數里爲版洞水出叢山間犬牙交錯舊志稱龍門山羣峰環聳蟠踞如龍中有坳路狀如龍門東稍

降入宜豐境黃葉仙壇在焉先五里來脉低處亦名大陽嶺石磴千級爲往銅鼓捷徑

四大金剛山在縣北九十里地名巖田村卽段仙故里也四山崇峻卓拔拱峙村旁東西成對東曰黃旗山曰東巖山西曰古樓嶺曰柏樹峯村中有光梵寺唐初建四峯值其四隅故以金剛名之村口有飛瀑高十數仞名清涼泉村與貴岡洞接壤

皂山在縣東北六十五里其色皂與四十里山相似東西蜿蜒十餘里有峯曰香爐矗立山脊東入宜豐境爲天隱洞南稍西爲大智寺正西數里爲皂山村東北隴畔爲燕子洞甚深邃內多石燕飛舞鄉人禱雨於此北接連香嶺至冬筍阮東北抵宜豐界

牛鬪山在皂山南十里宜豐界一山上合下開中空如巷形肖二牛之鬪通小徑若隘口

天師山在縣東北四十五里介上高宜豐萬載之交西距羅城八里北距皂山十餘里脊與皂山相屬多蒼黑石

釣魚臺在羅城水口下有深潭涼傘石在潭中水清常見傘高丈餘旁有石巖頗深

東郊外有省立中心苗圃意在培植森林

縣境居萬山中溪流悍急夏水暴漲山窪且成澤國然雨止則涸故不憂澇而常憂旱也新學以森林能吸水致雨此說風行鄉村頗著成效亂後隨意砍伐童山彌望當局日言造林且以清明爲

植樹節值生機發洩之時拔而移之他所十不活一以兩年來目之所見且百不活一焉樹木之計比於樹人少而壯者不可保如此孩提者又可冀其成立乎造林而不嚴懲偷竊北轍而南轅愚者且知其不可當道皆明達人試看十數年之山木成賊幾何迭成幾何林木翦蔚暑氣鬱蒸雨量自宏山泉直達池塘易滿利之所在民樂趨之已成者卽於摧敗而欲未成者之速成庸有當乎今日塘堰陂池猶是也而不以時修築彌月不雨泉源中斷田疇禾枯民困租紬課賦不以時至而官亦病設新政者恆言造林矣何不深維其本而令陂池塘堰多十日半月之蓄乎反覆思之而不能已於言也

蜀江卽城北龍江在縣境爲龍江入瑞州爲錦江西江九水蜀水君其一水經注謂之濁水漢志建成縣蜀水東至南昌入湖蓋蜀濁古通字也舊志俱載源出金鍾湖今考其正源實出縣西一百二十里古神尖北之流水壁東北流二十餘里入縣境之新賢里穿零江橋西源水自左注之西源出宜春大平關東之虎爬泉東經慈化寺南又東北至鉢孟塘左收幽蘭山水入縣境七里合正源東北流至棗木橋北收坳下及大水源水又東至朱溪橋左收仙人塘水又東南流右收獲富水轉東北五里石塘水自左注之又轉南至櫛樹潭後槎水合宜春荷陂嶺水自南來會始通舟楫立市鎮爲吳楚通衢又東流穿下停橋數里至大關嶺下折而北

三里至池下黃茅水自西來會又北流五里經濠田坡三里出村  
口兩岸有山交互五里歐江冲水自右來會穿獅子橋爲潭埠市  
白水自北來注之曲折東北流三里爲浩石蘇溪水自南來注之  
又東北行南傍山麓北過大廟四里至水南山口水自北來會又  
東北流三里過魚鱗灘亂石如鱗舟從石罅中行又曲折三里至  
上鈐田灘險亞於魚鱗龍溪水自北來會又東流二里至下鈐田  
左收沙路冲水折而南三里繞車上又屈曲東流五里左帶黃岡  
瓦宅梅源水自南來會又東北流七里至深塘將出口兩岸有山  
對拱南岸數峯憑空突起陡插橫欄江狹水駛勢如箭激舊志云  
野猪河自魚鱗灘而來奔澎峻急舟過者慮其險立水府祠以鎮  
之自此出野猪口北傍小車庵二里至官莊牟溪水自北來注之  
合牟溪水東流三里至輓石窪折而南六里經北窪饒田水自東  
來注之又南流五里西傍南窪爲蔣家渡桃源水自西來會又南  
流西經緬村六里至高城禮山水自西南來注之又東里許谷源  
水穿竹潭橋來會轉東北流經白塔之北李家園奇圃諸小水以  
次流入八里穿竹渡橋後塘水自右來會折北西流三里至紫蓋  
山東麓爲連頭三彎又屈曲東北流七里過上下吹黎南則木星  
腦北則馬腦嶺兩山對峙若巫峽江中巨石橫欄如門限舟必擇  
口而出三里經仙遊巖之北左收大和觀水經獅巖之西里許爲  
南田舊志載獅巖水與縣北龍潭通非也自南田轉南東流三里

爲高車亦名穩渡石版堰水自西來會轉東流三里過龍山之陰  
龍河水穿城橋自南來注之兩水交會合流而北匯於龍洲俗呼  
大江洲穿龍江橋江心起中洲障塞水遂分流一傍棧下一傍江  
口至洲尾復合五里至多江石筍阡水自北來會一帶車陂重疊  
稍旱舟輒不通自多江轉東流呼田英山諸小水以次流入又東  
至布頭厰塘水自南來會二里穿康樂橋里許東樓水自北來注  
之又東南流三里爲塗口塗溪水自西來注之又東流二里許右  
納黎樂冲水石岐水折而北二里至興江口錦江水自北來會轉  
南流三里爲灌潭又折北流二里爲澄渡折南東流三里爲湖潭  
煙塘水自南來會又東北流右收高嶺上南面水四里左收宗塘  
赤陂水爲九子石又東北流二里爲軍車入上高境由是瀝裏水  
出埠頭岐山水出山棗渡對岸泰溪水出社田駱家嘴皆由上高  
境而萬載之下游終焉

黃茅水舊志載出金鐘湖非也金鐘湖僅窪田數畝水西北流入  
瀏陽黃茅水在黃茅村大綱山之東有三源一自鐵山界東流經  
峽山橋下至黃茅市一自軍屯嶺之西南流雲峰洞之東至黃茅  
市穿周陂橋與鐵山水合至仙居橋北帶江仔冲與李家坊之水  
至路下一自軍屯嶺之東南流經源頭村又南至路下與黃茅水  
合東流爲芳木山折而南西帶車陂頭水至池下東南入蜀江  
又大綱山南西諸水流爲改江古瀝江之支源也亦有數源爲基

盤石爲顯功嶺合爲東阮南西流又西爲風車紐下至太扇洞合  
相見灣水南流高橋頭右帶西阮水西南流左合東阮爲改江下  
經許布尖之西巖前尖之東爲改江村自源至此二十里流入瀏  
陽境下達湘江

歐江源出峰頂山之九峰有二源一出九峯北下經南源頭西流  
至東岡尖之西折而北爲柴田一出九峯南由石陂上西流爲蔣  
家坊爲鐵爐背折北流爲嶺東至柴田合右收樓陬水穿柴田橋  
出村口曲折北流西經樟樹棚左收翠竹庵水折而東爲鵝窠裏  
折北流里許爲歐江其東藍田水來曾源出鴿子峰北西流下至  
藍田右收桐木坳西水西北流與歐江合又西流七里至潭埠入

### 蜀江

白水在縣西北九十里源出陽洞嶺南經老山下右收中原水下  
經白水村又收右源沙冲水穿陽澄橋左收東山水右收西阮木  
馬駁水轉東南流又收羅家橋水因果橋水南至潭埠入蜀江  
蘇溪在縣西四十五里源出荷嶺北流五里與布狗冲合折而西  
左帶宋源水爲蘇溪村又合冷水井水折北西流又收東西兩源  
水出兩山交互中八里至浩石入蜀江

山口水在縣西五十五里分東西二源東源出卓筆尖東流經書  
堂山之陽炎皇聚之陰折南西流爲窪裏轉南爲苦竹坳西源有  
二一爲墨鬚磔一爲鎖匙灣二源抱白水嶺東麓而出合爲一出





山口合於仙源市西南流六里至袁家墩與西源合東流三里爲龍背上左收礫上小水坳將軍廟水東穿羅漢橋又里許穿石版橋左收鷹嘴石水折而南至清水塘山宇水由神嶺寨東麓東南流自右來會又曲折數里經山谷中至船蓬嶺之東出谷爲潭口兩岸石山對峙如城出口下穿四十里山至嶺下左收箬坪水穿石橋東南流左與東溪合東溪北出上大平里亦有東西二源西源爲桑寮源出黃皮尖之西西流右收抱古嶺水折而南左收橫嶺背水穿桑寮橋三里轉東流與東源合東源爲東江黃皮尖謝山相夾之水自打鐵坳南流穿東江橋經上中下堡左收摘橫水出口合於西源東流里許爲馬下又南東流六里穿石馬礫頭

橋黃沙阮水合爐前壁水自左來會從此曲折西南流左收禾坑及青山坑水右收三牛坑水爲黃田村又數里至雙江口與西溪合可通竹筏又曲折南流經西江村出高陂爲牟村平疇開曠聚落頗盛水南西溢過石牛潭至大橋市穿石橋里許折而東有江心泉左收白石尖水合大平街水南流出牟村口又右收子塘步水左收上鑑坑水塗家坑水至官莊入蜀江

饒田水在縣西二十里源出龍王腦水西南流經八角亭右合裏路水至霞陂出口經北窰入蜀江

桃源水在縣西二十里乃五神嶺東面之水介山田嶺猪婆嶺兩山之間有南北二源南源傍山田嶺爲大桃源北源傍猪婆嶺爲

小桃源兩水各帶數小水合爲一東北流八里爲桃源口入蜀江  
禮山水在縣西三十里峯頂山東北面之水也源出煉魔場下北  
流湯周觀三里降下深谷又三里爲鴉雀口西流三里折而北爲  
禮山村左合峯頂山東面諸崖谷水又北流三里左收桐木坳水  
又五里經橫山大坪左收上方坑水東北流合彭家坑水野雞沖  
水會於昌橋三里至高城之西入蜀江  
谷源水在縣西南三十里長垣山西北面之水也東北流三里爲  
谷源村又三里西合大塘庵水經石函橋東收裏壑秦公廟水爲  
高橋村北流五里至高城之東竹潭橋入蜀江  
後塘水在縣西稍南二十里西與裏壑隔山分流之水也東北流

左右納數小水北經望府樓西爲後塘村又北流三里左合牛坑  
水二里至竹渡村右收穩山關水又北流里許至竹渡橋下入蜀  
江

石版墩水在縣西五里自望府樓之左水往東北流右收荷花塘  
水經五里亭合各沖小水聚於下墩東北流出村口又五里至穩  
渡入蜀江

龍河卽穿城之水也以龍山得名其自南浦橋入者有三源一爲  
竹山洞水在縣西南二十五里源出宜春虹霓院東北流至大石  
笏入縣境小石笏出雲連洞繞一平田復入洞穿山四里出竹山  
洞東北流里許南合四都裏諸水又東北流經王村小浦水口裏

共十五里至兩河山橋爲天陂堰一爲田北水在縣南二十里亦有三源一出大原山之南東北流入縣境爲龍潭裡一出白沙嶺之南由宜春陽塘巖嶺來一出天馬山西審窩裡三水皆穿洞入縣境合於田北村北東流里餘爲寨下五里爲黃田四里至天陂堰與竹山洞水合一爲郭村鋪水亦有二源一出宜春之西嶺爲潮水下流至塘下一出宜春楊柳窩西北流至八角亭上合西嶺鋪水經亂石里右合東嶺下水左合塘下水入縣境爲界牌堰經周家市收甘泉水西北流至郭村鋪逾雞潭納石溪虎坑諸小水五里至張家塘折西流三里穿楮樹江橋西與天陂堰水合北流三里穿南浦橋入城又北流半里至學前江其自烏溪門入者源出仙姑嶺東岬下經東岐北流鵝峰牙梳兩山間轉西流傍雞籠山之北春夏則見流秋冬則伏地又西流五里經塔下至烏溪關入城半里爲石江橋俗名王家橋東北有水來會源出大畚布田隴間南流三里爲花墓前合收戴公埭水隨圳南流左合萬家隴水至水管頭入城轉南西流經九仙觀前至王家橋頭合烏溪水會於學前江其自城西入者源出西屏山之西東流至西門偏右水管入城東爲田下東北出再思橋至學前繞筆架山會南浦烏溪二水舊志所稱三江是也從此合流北朝學宮穿雙虹橋經龍山之東里許穿新橋亦曰龍河橋出城瀉下崇文閘兩岸奇石森列西北流與蜀江合

石筍阮水在縣北十五里源出易公坳南流石筍阮合數小水右收亭子坳東水聚於石筍下穿兩山之間又南流至王家墩又東南流至多江入蜀江

厥塘水在縣東北四里源自東郊茶山腦而來北西流經豹虎嘴又北流爲厥塘墩又大畚布之東有水南流折而北至厥塘墩兩水相值合而北流三里過康樂祠下轉西北流穿浴塘橋二里許入蜀江

東嶼水在康樂橋北有二源西源自壺仙嶺東南流收左右各沖小水三里至東嶼廟東源自分水坳西南流至東嶼廟與西源合又南東流三里經中村墩入蜀江

塗溪水在縣東北十里分東西二溪東溪爲一都墩源出浮樓山北面又分左右二源左源出糠頭埭西南北流由布仔上至一都墩右源出高塘裏北西流由大灣裏至一都墩與左源合西北流二里經石灰嶺之東左收天井塘水二里至塗陂西溪爲塗泉村源出鵝峯之北自小鵝峯以下北流三里經大畚口左收徐家塘水二里至塗泉墩合塗泉塘水北流二里至鎖匙灣左收玉屏山南小水折東流里許至塗陂與東溪合兩山夾峙水濱出口屈曲東流二里至塗口入蜀江

錦江在縣北二十里分東西二源西源出謝山之北東流遂谷中出谷口收上坪水下經官田南東流右納朗源水二里左帶高村

坑水爲謝陂村東南流四里左收早禾田水右收黃土礫水天寶  
曠水爲佛嶺三里至中菱湖上菱湖水自西來會折東流里許北  
收蚺蛇坑水東穿西江橋巖坑水自左來上承大蕪山西麓水南  
流十里左收下菱湖水又南流與西江橋合諸水所聚出兩山交  
錯中又迴折五里至迴嶺亭名黃田江西收竹山下水東收洪坑  
水數里出山口爲白良村過謝陂爲錦江里許穿錦江橋又南穿  
白良橋又南經冠邱山之東繞青陽洞南流至江邊里許出口右  
合十七都陽和里諸水其源最長者爲高低嶺俗名背箕窩西南流  
四里經虎塘折而東又數里穿淨陽橋爲店前西收西源庵水嘴  
頭水又南收南源庵水轉東流三里爲廖巷北收漢源嶺水又里

許北收大東山水又東爲豐田爲坑口左收岐里水經下碓轉東  
南二里至高田裏源沖水合路塘沖水自右來會又東南流數里  
至曲陂上范塘水合上藍坑水亭子坳西水北流范塘村出口自  
右來會又右收赤溪沖水東流里許至曲田與錦江合又東流里  
許穿煙包橋右收易公坳石礫長興寺諸水東流數里爲岳裏右  
收壺仙嶺北諸水爲福塘村福塘泉至左來注之又東流二里穿  
花塘西橋東源自左來會東源出大湖山之陽山半有村曰東  
源西源兩水合流南繞昌湖嶺之東爲礫下村轉東南流五里經  
白石裏又五里爲明江十八渡水自左來源出芳坑嶺南東流四  
里爲十八渡又二里兩山交錯一水曲折其中東流四里爲鳳頸

萬壽縣志  
裏折南流四里穿石橋與明江合南流三里繞明江亭穿羅陂橋  
出口二里爲廟背一里爲開塲上二里爲小洲上左收平山頭水  
折西南流二里開源水自右來源出桐子嶺南東流五里西收沙  
洲曠水東流五里爲開源村南流二里爲蘇姑臺二里出山口爲  
西陂又三里穿虎溪橋里許與明江合西南流二里經三百興土  
城之東轉南西流里許爲裏裕村又一里爲銀田村又二里經逍  
遙觀之東右收湖源堰水四里穿花塘東橋與錦江合又東少南  
流右帶石獅裏水曲折五里穿萬歲橋二里至石灰山西鄔家坊  
水合雲峰嶺水自左來會五里至興江口入蜀江

舊按錦江舊志誤爲康樂水不知別在羅城也其在白良爲錦江  
在三百興上爲明江出口爲興江隨地易名

煙塘水在縣東十五里源出浮樓嶺東北北東流數里爲煙塘分  
上中下三堰右帶小水三里至牛路陂又東北流入蜀江

岐山水在縣東北三十里岐山村源出青背坑西北叢山中東南  
流左收清泉山西麓九子礫水十餘里至山口又四里至陶逸巖  
之東三里穿白沙橋二里爲長園裏五里穿磚橋二里爲岐山村  
漳源水自左來源出清泉山東麓南流入里經漳源坳折而東爲  
廟前左收游家嶺西諸水南流至橋頭村麻田水合上源堰水由  
羊牯腦南東流左收湖仙塘水又南穿杭橋西與岐山水合曲折  
經岐山之南新塘山水自右來源出七重山東東南流經新塘山

關帝廟折東流左收鍾家坊水轉南東流與岐山水合又南東流  
三里左收大小梅阮水入上高境其下三里爲黃田又六里入蜀  
江卽上高山棗渡對岸

恭溪古康樂水有正源支源皆合於康樂古治卽今羅城止源出  
縣西北一百一十里鄧公嶺之東由鄧公廟址東北流六里至飛  
虎口其北爲杉樹坳水源出金盆架東流右收龍潭江水經山  
峽中爲飛虎谷折而南出口與正源合東流里許至水棚下其南  
西爲大西阮水源出英公嶺東北流二里經放馬廠五里右納過  
山窩水爲大西坑三里經九里廟至水棚下與正源合又四里至  
七里墩合成坑水源出黃皮尖之北北西流出谷口對七里墩南

入正源又東流三里折而北至雙江口其西北爲三陽坑水源出  
三界尖爲東蔗坑南流至議事亭址西收校車峽水折東流右收  
羊蔗坑留皮洞皇覺寺湯家洞諸水以次合爲三陽坑南東流經  
七里墩之北又折東流里許至雙江口與正源合又北流里許爲  
苦菜洲又東流三里天井窩水自北來源出天井欄山二水交流  
東南流數里入正源又東流兩岸石壁陡絕二里逾阿彌陀佛橋  
又二里鵝頸沖水自北來源出天井欄東麓爲西瓜磔南流爲鵝  
頸沖出口入正源又東流一里爲關鹽山山半頗有田如梯南收  
黃皮尖山陰水萬祝寺水黃絲磔水合爲一自南來會折北東流  
出村口穿石橋二里爲黃土灣三里爲曹家灘北有硯阮水源出



霍少尖自左注之東南流四里爲黃貓磔有兩院至箐口合爲一瀑垂數十丈自左注之南流三里有檀木院水雙源東流合爲馬尾磔自右注之折東流四里經高嶺磔口高嶺諸水自右來有二源一自黃皮尖東北麓爲打鐵坳水合諸小水北東流一自謝山西北麓土地坳暨石下合諸小水至磔裏合爲一北流至高嶺磔口有飛瀑其下有潭穿石橋入正源東流四里懸崖如巷水從亂石中爭流折而北里許黎源水自左來會黎源水出鰲花座之西西南流入里爲關門石四里爲黎源上村三里爲中村倉前三里爲下村峭前舊設外委於此左帶水曰軍屯裏曰金盆架曰佛嶺畚右帶水曰白石坑曰同古坑其南溪中有石峽即武功峽又南

流三里金鈎嶺諸水東合暗洞水經西坑市自右來會又南流五里左收河口諸水又三里爲朱紫壩右收霍少尖東北諸水兩山闌入溪中如頓笏如龜嶼轉東南五里爲黃石頭又轉南流四里與正源合山泰溪正源合黎源水東南流里許出峽口折而東爲船埠潭通小艇竹紙受載於此北收觀鷹橋水源出穀皮尖山谷中半爲銀腰帶合東西坑磔各水南流左帶觀鷹尖山陰水穿幽崖中合流至觀鷹橋入泰溪自此屈曲東流南則紗帽尖北則觀鷹尖水出兩山支脚交互中爲黃石洞爲霧露灘爲朝江埠爲鳳凰洲爲蜈蚣磔自船埠潭至此十五里左帶數小水爲鶴頂岡爲平壤爲鳳凰窠以次注之右帶數小水爲黃岡洞爲大竹山爲大

茅窩爲鋸坑爲練坑皆自紗帽山陰北流以次注之自蜈蚣磔折東北流左收狗熊巖水源出九頂山南南東流十餘里自左注之又東流半里爲將軍石煙竹水自右來會煙竹水有南北二源皆出謝山之北南源出土地坳北源出紗帽尖之陽並東流十餘里至上堡合爲一又東流四里爲煙竹村頗開陽有田畝相傳爲宋劉長者及明給事劉蓋布政易節故里其水曲如鉤轉西流一里折而北出村口穿山峽如入隘巷中三里又西北流一里出口至將軍石入泰溪北流二里經山田院左收螺絲泉水曲折東流三里至梯石又右收虎頭尖諸水及碧雲寺水北流三里折而東爲上高村始見平甸西北收九頂山陽諸水源出九頂之上台峰

分三源一爲冷水坑一爲黃岡窩一爲歐岡嶺三水合一連跌飛

瀑爲霏玉泉石門泉碧井泉皆高十數丈左帶小水二出山口入

泰溪東流里許舒家坑水由楓城洞潘公坳折而西自左來會轉

南東流二里爲黃岡陂二里爲中高村溪北爲石下爲山灣裏溪

南爲陽家洲又南爲更古山自船埠潭至此二十里又東流二里

爲龍埠又二里爲虎頭山其下爲高村市北收虎坑水源出雞冠

尖西流十餘里右帶小源嶺水出口折而南二里至虎頭山自左

入泰溪東南流右收茅源坑水東穿南山橋爲高村水口村內開

陽數里至是兩山復合水屈曲流數里右收小溪坑水爲小溪渡

折而東又收捨身磔水東流三里岐源水自右來會岐源水源

出謝山之東棠藥洞東流五里其口有成鼓尖高如頓鼓水環其下出口右收小洞諸水爲岐源村地頗平衍三里穿橋亭繞螺嶼東飛瀑高三丈南東流右收芳坑嶺及雲芒山西麓諸水折東北流三里穿米嶺橋北流經薑山石入泰溪東流經天湖雲芒兩山交互中三里爲豬婆甕有山如蚌溪水環繞四里又東流入里爲厲公陂又七里爲三十把左右諸水以次注之又東流六里爲環溪嶺出山口漸開陽不復叢山交偏又東流二里右收甘家坑水爲何家洲東北爲虎符又東北里許左收背廈墩水爲上澗田又東流三里左收墓裏水爲下澗田又三里爲武家腦又東里許穿蓮亭橋東經羅城墩三里爲中洲上藏溪水自左來會 藏溪水

泰溪支源也上出大陽山燈盞窩南流版洞下穿龍門山左帶大塘坳水右帶半欄洲水南出山口至上坪村有平甸其西北爲楊黛山左腋天寶窩水左合大陽嶺水右合棧樹嶺水自右來會南東流六里有高礫水源出溯祖坳西流合蝦蟆石水至賈家塘自左來會屈曲南流又薛家山水流源水以次自右來會又南流經軍翁裏西繞大陂上之南又西有中坳水源出穀皮尖大坳水源出坳頭右帶陶坪水東流五里合中坳水自右來會轉東流東北有長坑水雙源合於下燕西南至長坑穿石橋自左來會又轉東南流三里至長礫溪中皆圓石如密星名鐵彈川下穿石橋以後兩山夾水七里東繞漸網洲折而南里許左右皆青石疊翠滄瀟

深狹如巷名青瑤港東流四里至固山其北爲嚴田水源出周家源五里南至嚴田汎汎東五里爲分水坳坳東爲湖竹坪有水東流入新昌洞上嚴田水自汎南流五里出村口爲清涼泉自左來會東流三里右收校車嶺水又東北流二里左收小水二又曲折流山峻中八里爲船埠水曲如環二里至磨石院其北西爲銅盆坵水自左來會又屈曲東南流二里其西南爲黃泥塘水有二源一爲洞院西與校車嶺對分之水也一爲和尚坑西與高村虎坑對分之水也二水東流合於黃泥塘自南來會又東流三里狗腸坑水自右注之圍山水百丈礫水以次自左注之又東流三里猴形裏水合谷籬窩水自右來會又東北流左收楊柳坑水折東南

流三里許爲九龍廟又三里許西南爲井坑源出井架山自右來會又屈曲流七里經雲頭尖之東五里出山口爲潘家坊三峯坑水自左來注之又五里右帶白雞坑水轉東流乃藏溪水也自上坪以來五十餘里叢山深谷不通大道故名藏溪至是始開陽有田畝東流四里左收五丈坑水折而南三里東繞滄江村南流二里左收皂山村水穿南園橋又南流四里至湖溪西入泰溪泰溪合藏溪水東流里許左帶湖溪水繞蟠龍石折而南經羅城之東三里經張家山東北收龍王廟諸水穿潭頭橋來會西收茜院水源出柘桑游家嶺合流至蓮花亭東流七里爲饒門爲茜坑左帶泥阮水繞西門來合東經烏泥塘左帶墩裏城上東流三里入

泰溪與潭頭橋口東西相錯東南流里許至釣魚臺石兩山環合  
爲羅城水口臺下有深潭由潭出口南西流三里至盧家石其西  
爲小水村水有二源一南出龍巖洞北東流一北出游家嶺隔山  
南東流右帶雲峰嶺水與小水南源合東流穿橋亭右收周塘水  
東經銅窟裏折而北傍盧家石自右入泰溪自盧家石東轉至觀  
上有古今二道古道經郭前踰油江橋至文昌閣入上高境今道  
自盧家石東流過湖仙潭里許入上高境其下四里至江東十餘  
里出社田駱家嘴蜀江自西來會與水轉東流舊按泰溪府志稱爲盧江以由觀上盧家洲得名其實卽泰溪所  
經特隨地易名耳

又鄧公嶺之西烏虎洞源出焉左帶木魚寺水右帶金盆架山南  
諸水爲墨煙洞三角塘李樹礫合爲一下經黃泥塘轉西南流左  
收九龍寺水由郭前折而北入瀏陽境

又黃石洞水源出金盆架之北右合校車峽水西北流入瀏陽境  
下合小溪烏虎洞水西經瀏陽城下達湘江編內衡字作境非作冲亦  
未是俗慣從省以衡畫多也此注

縣志山川乃先輩李榮陞之所作也條分縷析藜然粲然先輩究  
心輿地而又生長於山水窟中故言之深長而有味也後輩足不  
履鳥道羊腸耳惡聞狐鳴虎嘯徒爲紙上之研究旣以山川入方  
輿土產食貨事也能離山乎陂堰塘閘營建事也能離水乎設新

法者以森林能蓄水田賦事也蓋不勝割裂破碎之懼矣

萬載縣志卷一之三  
方輿  
氣候 祥異 風俗 古蹟 封爵  
萬載當宜春之北更北則修水境東接上高西控衡湘南抵清江  
縣治在萬山間夾水而城山川秀麗風氣和平冬至始寒下雪間  
有積至尺深者或雨霰交集同雲若霽為開雪眼盈盎薄冰見陽  
輒釋季冬寒氣襲人沐最易結簷雷間有水筋俗云小寒大寒滴  
水成團春初寒不減冬謂之倒春寒又云一冬無雨雪盡在正二  
月正月十六宜晴俗云雨打殘燈盃早禾一把稈二十日宜雨俗  
以為寒婆拾柴雨水陰霾多而晴霽少棉衣單拾早晚異宜近驚

萬載縣志卷一之三

方輿

氣候 祥異 風俗 古蹟 封爵

萬載當宜春之北更北則修水境東接上高西控衡湘南抵清江  
縣治在萬山間夾水而城山川秀麗風氣和平冬至始寒下雪間  
有積至尺深者或雨霰交集同雲若霽為開雪眼盈盎薄冰見陽  
輒釋季冬寒氣襲人沐最易結簷雷間有水筋俗云小寒大寒滴  
水成團春初寒不減冬謂之倒春寒又云一冬無雨雪盡在正二  
月正月十六宜晴俗云雨打殘燈盃早禾一把稈二十日宜雨俗  
以為寒婆拾柴雨水陰霾多而晴霽少棉衣單拾早晚異宜近驚

螿多寒謂之凍螿螿田婦炒米豆之屬以啖兒童謂之炒螿螿春  
分喜在社後俗云先社後分米穀價鈍先分後社米穀長價清明  
天氣始和俗云清明斷霜社斷雪桐花初放俗云桐樹花開便浸  
種有攔社種清明種近年社種絕少浸種多在二月末三月初俗  
云三月清明前二月清明後清明宜晴穀雨宜雨俗云光清明暗  
穀雨又云清明要光不得光穀雨要暗不得暗穀雨擇薑栽之候  
生子薑先取薑娘俗云穀雨栽薑夏至取娘又云穀雨打死筍俗  
以筍不成竹者爲死筍立夏或在三月歲必歉俗云四月無立夏  
新穀糶過陳穀價立夏後冷謂之栽木寒竹黃可斫俗云竹黃不  
吃小蒲水小蒲宜雨俗云小蒲不蒲芒種不管又云芒種芒出夏  
至禾出又云芒種芒未出夏至禾先出梅雨蒸溽俗稱爛梅天磚  
礎漬潤時帶微寒俗云吃了端午糶寒衣方可送午日爲藥玉曬  
藥俗喜雨多雨驟漲謂之端陽水又以十三日爲關王磨刀水十  
八日爲天符水芒種宜晴俗云芒種火燒天夏至雨綿綿夏至後  
九日驟雨或連日雨謂之夏九孃又云夏至不下高田枉耙每以  
去歲冬至日占之冬至晴一日夏至晴一七夏至後逢辰日爲分  
龍農家禁用糞桶俗謂是龍所忌以晴雨定雌雄雌恆雨雄恆晴  
晴雨分上下簷雨來卽止俗呼過路雨雨不經時又云春無三日  
晴夏無三日雨六月六日不宜雨雨則生蟲俗以爲播官節爭取  
衣物出謂之晒播官早稻半黃俗云小暑捋大暑割又云手把禾

頭七十工蓋自分秧至此恰七十日也立秋後熱甚俗謂之二十四隻秋老虎種豆宜早俗云處暑後莫種豆蕎麥處暑後可種俗云處暑安蕎白露看苗又云白露白茫茫蕎麥芫過行風起乍涼謂之凍桂花連旬陰晦謂之八月弄寒燠難調俗云白露秋分節夜涼日裏熱社日宜雨俗云春社無雨莫耕田秋社無雨莫種園晚稻至此結穗俗云寒露不勾頭割將歸來喂老牛淺山茶子可摘有秋分子寒露子深山剗地平霜降以後用帚掃俗云茶子不空樹蓋以實方落而花已開也苧一歲三刈四月爲春苧不吃夏至水六月爲月苧寒露爲寒苧秋穫趁霜降俗云霜降不打禾一皮落一籬十月宜霜俗云十月無霜確白無糠自十月至十二月

每初八有霜爲半斤十六有霜爲一斤得霜三斤來歲必稔立冬日尤喜晴俗云立冬有雨無路行又以九月初九十九二十九爲三陽有三陽無雨一冬晴之占晴久天氣必暖俗呼爲小陽春日漸短俗云小雪大雪煮飯不徹大抵五鄉山氣盤礴縣城漸平曠氣候亦微有異視月令不盡合元鳥至多在二月鴻雁來亦愆一月期北鄉又多在明春正二月入冬蟲蠕蠕動未嘗蟄也桂花九月最盛菊花亦多後時冬月桃李重開蜂蝶羣飛不爲異六月少雨所謂水潦盛昌大雨時行者殊不然近兩三年春夏之交水苦不足高原田畝至於犁而坵坵而復犁終於不能插秧或者南北之氣隨時變遷與視舊增刪數十百字



宋大中祥符三年秋七月江漲沒民田采府志補

景祐三年夏大雨驟漲壞民廬官署圖籍倉廩泮沒參府志

紹興四年自夏及秋大水

舊按舊志誤次淳熙後今更正

淳熙五年夏五月大水

舊按省志府志僅載分宜大水九年夏五月不雨至秋七月

早十年大旱十四年夏五月旱鬻度僧牒糴米備賑參豫章書

十五年夏六月水圯民廬

慶元六年夏五月大水自庚午至甲戌漂民廬害稼參府志

嘉泰四年春大饑殍死不可勝瘞發常平倉賑之部使者益以緡

粟參豫章書府志

元至元二年饑豫章書五年冬十二月饑二十七年秋七月水

采豫章書補

大德七年夏五月饑府志

延祐二年夏久雨錦水浸溢三年夏五月饑

泰定二年夏五月饑豫章書

至正二年米出石穴邑南月臺山有數巨石穴中每旦出米少許貧者得焉

一日有人先往竊取之遂不復出十一年夏大水二十年春雨雪六

十日

明洪武二十二年旱三十四年夏秋大雨

永樂十年春大水

宣德九年大旱 十年又旱民饑

景泰三年冬四年春凝雪兩月餘寒甚 六年大旱斗米銀一錢

天順二年夏四月大水山崩蛟出 五年大疫

成化五年冬十二月雙虎咆哮東關外白晝噬人行旅滅跡 六

年春正月知縣陳璨爲文禱城隍祠虎旃遁 十年民饑多盜

十二年夏五六月不雨穀價騰躍互相攘奪後有監巡坐賑立別

足之法民稍甦定 十四年夏四月十六日大水雙虹橋圯 十

六年大水給事劉蓋宅盡陷水口洲渚成川

宏治七年冬嚴寒林木枯摧人多凍死 八年夏五月不雨至於

秋八月民大饑 十一年旱 采府志 十六年夏大旱民饑

正德元年夏旱秋七月大水山崩橋壞墜民廬舍早稻入於泥

三年夏大旱民饑 四年旱大饑竹生花結實如米民多採食

五年旱饑 七年夏旱民饑 八年夏旱饑 十四年仁壽坊彭

顯家芝生柱礎間 十五年大水衝破城舍民居

嘉靖元年春夏大水漂沒民居龍河渡沙洲復起四月泮池雙虹

見自南竟北五日五月大水饑 省志 三年春三月雙虹復見於

泮池自西竟東三日 四年秋八月縣城晝火自邑治前起勢四

發西城全燼值巡撫盛及守巡按部在邑拜禱止 五年大旱省

志 七年夏四月靜安寺產瑞芝頃刻數本各異色冬十月知縣

林署金鳴若雷七日始息 十二年夏四月連旬陰雨谿壑漲溢衝破橋梁廬舍漂沒木麥人民無算有司發倉賑貸 十三年春正月初八夜儒學東廡平地火光燭天數刻乃滅 十六年春三月芝產龍國臣父墓 十九年春正月至夏五月不雨大饑斗米百錢民食樹皮盡採蕨根爲粉充啖遂病疫饑殍滿野 二十一年夏六月建城坊民園梨花盛開參府志 二十三年旱大饑省志 三十五年夏大水 三十九年春大水 四十四年夏大水 萬曆四年夏五月二十四日大雨水驟漲漂廬拔舍龍河橋全壞雙虹康樂二橋衝倒其半居民泮死無數沿河一帶田禾水推沙塞賦皆民墊 五年秋九月石隕於演武塲聲如雷入土尺餘掘

之指甲可破俄遂堅 九年雙虹橋一帶火災民若被燬無數 十年大水 十六年夏六月大水 十七年夏五月不雨大饑 十八年春大饑穀石六錢 二十年大水

舊按府志二十年萬載旱未詳孰是

二十一年大旱疫道殣相枕籍 二十七年春夏先水後旱 三十七年六月淫雨經旬二十四日大水山蛟四出官署橋梁盡壞漂沒民居田無算斗米百文荒糧益甚 四十年夏四月二十八日大水屋舍漂流民田剗壤無算驟漲民不及避溺沒以數千計 四十一年大饑 四十二年大饑穀石六錢道路攘奪 天啟元年大旱 二年夏四月大水 三年夏五月大水六月至

古事錄卷之二  
秋七月大旱民饑南門火燬廬舍數十戶 四年大水 五年大旱禾苗盡枯斗米銀一錢

崇禎元年大旱 二年水荒 五年大旱冬十二月初二日雨黑穀可食有拾至數斗者省志六月 六年夏四月大水六月至秋九月大旱 七年旱大寒日雷震 八年夏四月淫雨連旬驟漲壞公廨城垣陂堰及竹渡牟村諸橋水次預備兩倉粟盡糜沿河死者無數秋復旱饑殍相望知縣韋明傑有詩紀災 九年夏四月大旱斗米一錢五月大水冲坑田地成山低窪者剗爲河民居蕩洗滄死甚眾 十年夏五月地震 十一年春正月兩日並出日下黑光磨盪凡二十餘日夏五月大水蛟出平地水深丈餘滄死

人民數十口壞田產無數 十四年秋大水 十五年春地震夏五月大水漂沒人民田禾甚眾穀石又九錢 十六年大水米石一兩五錢 十七年春二月地震  
清順治二年夏四月大水白水書堂焚蕪各鄉出蛟山崩地陷漂男婦蕩民居滄禾苗 三年夏五月不雨至冬十月大旱 四年春大水荒六閱月饑殍相枕籍穀石八九兩米斗一兩八九錢竹花結實可採食 八年大旱饑 九年大旱饑 十一年秋有蟲食禾類蠶而大每集數萬禾盡乃死臭不忍聞 十三年夏秋大水 十五年秋蟲食禾府志十五年萬載水 十六年夏旱 十八年夏五月大水

康熙元年夏五月大旱 二年春三月大水秋七月旱 四年夏五月大旱無禾府志 五年夏四月大水 六年夏六月至秋七月大旱 七年春三月水夏六月旱 八年秋蝗集民居醮禳之 九年冬十一月大雪深五六尺月餘始消樹木盡折鳧飛蔽天 十年春正月夜天見火光若兩門開狀長三十餘丈闊四五尺 十一年夏六月夜有火毬墜福壽坊汪家巷著地圓轉逾時始散 氣如硫黃 十二年秋蟲食禾 十三年夏五月白水蛟出湧水數十丈石腦背潭埠三十餘里人畜田廬盡沒 十四年夏四月天鼓大震 十六年春大水夏六月大旱 十七年春大雨連月大饑斗米一錢五分知縣吳自肅詳賑復發銀市市汊米以貸民稍甦 十九年秋蟲食禾 二十年秋旱疫各鄉白晝虎傷人知縣常維楨以文禱城隍神患始息 二十一年夏五六月間每日午有青氣如鏡與日光摩盪冬十月火災城市鄉村不時發知縣常禱止之 二十二年春三月大水獲富嶺東黃茅石腦背各鄉出蛟潭沒男婦田廬秋七月大旱早禾盡枯遲稻半焦 二十四年歲大有府志 二十五年務前下街火延燒城隍祠秋大雨雹禾穀入泥 三十年青蟲食禾 三十四年蟲食禾 五十年有江豬逆流上至潭埠土人殺之重百餘劬 五十一年夏五月潭埠火市肆居民皆燼秋七月十四日務前下街火飛燄橫江文昌閣暨學宮東廡俱燼 五十六年冬十月知縣龐署內牡丹華 五

十七年春三月大水南浦橋圯 六十年夏大旱

雍正八年夏六月嘉禾生一莖三四穗邑所在多有是年始奉命設農官以上本舊志

乾隆元年歲告豐府志 九年春二月宜春慈化蛟出水溢萬載

漂沒田廬滄斃人口知縣嚴在昌請賑領銀二百五十餘兩秋九

月雨雹府志 二十三年夏六月水漂沒廬舍橋梁知縣張立中

捐郵府志 二十年春三月大水荒民多搶奪 四十年秋九月

蟲飛蔽天食禾幾盡民用竹銃擊之散 四十三年大旱蟲食禾

四十五年夏五月大水逆流入城湧過烏溪門 四十六年冬大

疫至明年夏方息死者極多十二月朔學前文昌閣火頭門牌樓

俱燬 四十八年春二月二十日儒學後圃樟樹火標東齋上棟

四十九年旱饑 五十一年旱饑穀石錢二千餘 五十四年春

正月朔夜文昌閣祥光燭天神像鬚眉畢顯 五十七年夏四月

二十七日大水逆流入城

嘉慶元年歲大豐 三年秋大旱無晚禾多種蕎麥幸不成荒

五年秋九月二十七日雪厚三寸餘 六年夏四月大饑隴田黃

茅四都等處出觀音土民取作糜秋八月疫 七年夏四月五月

大饑米石錢二千餘民舂糶子作糧知縣來珩請緩征 九年歲

告豐 十一年夏五月痘疫多天死秋大旱 十二年春二月黃

沙蔽天三日空中有聲對面不相見室中几榻頃刻積寸許拂去

復然秋痢疫流行上鄉死者尤眾 十四年春三月農田分秧大雪耕牛有凍死者 十六年夏痘疫死者相望次年春月方息秋霖傷稼 十九年夏饑 謝啟蘭妻郭氏一產三男 旌 二十年春疫 二十一年春二月大雪凍死耕牛 二十五年春大疫夏痢疫繼起傷人甚眾黃茅附近大風發屋壞門合抱樹皆拔摧石牌坊二自五月不雨至秋八月大旱

道光元年春正月朔大雪連旬不止雷冰垂地秋有年 二年夏五月十一日大水高過烏溪門睥睨逆流入城西鄉大橋一路橋多圯以畜漂流田或崩壞秋有年 三年大有年 四年春三月十三日書堂山口白楊店龍田西江大橋各村大水壞田廬人口

有渰斃者秋有年 五年有年 八年夏旱 九年有年 十年春夏淫雨秋蟲食禾 十一年夏五月初七十三兩次大水頃刻丈餘倒灌入城衝塌房屋無算沿河田盡沙壅鄉村山有崩陷者六月二十九日六區出蛟橋梁民居多蕩沒沖失男婦三十三渰斃七口秋青蟲食禾大饑斗米錢四百有司勸捐糶賑請撫緩征 十二年春正月至夏四月淫雨害稼六月七月旱八九月雨綿延至冬繼以雪彌月不止知縣龔士範勸捐運糶 十三年有年十四年秋旱 十五年夏大旱秋霖雨傷稼斗米錢三百八月慧見西北十餘日滅 十六年夏旱 十七年有年 十八年春三月初七日大風邑西高村小源一帶雨雹如拳壞民居牛羊死

傷甚眾 十九年夏五月初五日太白晝見 二十二年有年  
二十三年有年 城隍廟戲臺鴟吻吐火節孝祠產瑞草 二十  
四年夏五月大水城內及株樹潭倒塌民居店房無數 二十六  
年夏自閏五月不雨至秋七月善戶運米平糶饑而不害 二十  
七年春旱夏自五月不雨至秋九月知縣劉恒恭勸商運糶邑以  
無饑 二十八年夏五月初七日大水平地丈餘較十一年高三  
尺冲塌民廬市廛無數秋蟲食禾  
咸豐三年夏久雨早禾生秧六月虎見平原文武官祭禱城隍遂  
潛遁 五年夏秋久雨傷稼冬十月初七日雨雹大風拔木二十  
七日日旁三虹環繞 六年螟 七年秋七月飛蝗入境祭禱撲

捕晚稻無恙 八年春搜挖蝗子各處收買無數遺孽乃盡 十  
年春二月雨黑水著地如淡墨 十一年秋七月彗星丈餘見於  
西方竟月始息冬十二月大雪 同治元年春正月大雪滴水成冰木多凍死三月二十六日雨雹  
大如拳瓦碎木折十月二十七日日方中繞日有虹霓四如張弓  
外向狀見者詫異有老儒索書觀之係白虹貫日主敵人內叛新  
輯 二年有年 五年有年 六年夏五月大水三區一帶冲塌  
房屋無數斗米錢四百餘文城內開倉平糶 八年大水株潭六  
區一帶冲塌田廬無數斗米錢四百餘文開倉平糶商民運米入  
境 九年饑斗米錢四百餘文開倉平糶商民運米入境 十年



有年

光緒二年夏五月大水距龍岡書院不里許有村曰鳧塘俗呼鳧鴨塘舊名古石塘有小山類鳧浮水面中爲龍姓祖墳塘以上爲田爲屋而環以山似別一境界光緒十五年六月中旬正午當空忽現瑞光初如星漸如日愈顯愈大愈高至數十百丈如東方日出自西望之以爲山上出來急足繞塘而過直至山上了無所見或以爲開地華如是者蓋七日而時刻不爽不知是何祥也二十一年夏秋大旱極貧之戶至掘觀音土和少米粉爲餅餌以充饑入而難出幾困三十四年夏秋大旱民國二年五月初八日高村盧家洲一帶大水電光所觸山如剝

皮大木倒插陵谷變遷三年三月大風拔木毀屋人畜多傷四年十一月有四日並出竹渡左近人多見之謂在日將落時或以爲返照炫目云五年五月大水雙虹橋幾傾兩頭店房盡推倒附城如宋如辛三日不下樓炊煙亦斷八年地震十三年地大震民屋搖動有聲十五年五月大水縣城損失甚鉅二十三年六月十日以後百日斷雨晚稻全枯明年四五月斗米萬錢二十四年有年二十五年十月二十八日雷電交作大雨傾盆蠅蚋嘖腥瞬息色變味臭本年早晚稻豐收二十六年立秋後淫雨兼旬黃皮尖湯周山均崩潰冲壞田廬無數漂沒居民十餘口二十八九年旱螟

高唐縣志卷之九  
士習黃庭堅道院賦序云士夫秀而文阮閱無訟堂記云士力學而知廉恥張栻記云士人好恬靜勵廉隅終歲不至長吏之庭遺韻流風歷久弗替近更揣摩風尚詩學字學其道並進蓋雅化旁流涵濡日久非獨山高水清之故也向時儲材擢秀城坊居多今鄉落人文亦漸蔚起故科名較盛  
民風舊志云崇樸素勤稼穡市鮮游俠鄉無惰民頗稱風俗之美又沐重熙累洽良有司董勸有方野安耕鑿戶樂輸將誠虞集所謂性多愿確易與爲善者也

農事燈節後香楮花爆擇吉犁田名起春工平衍之田兩次犁耙高燥者三之穀有占糯二種占又有早晚二種占兩獲糯宜下濕止一獲故糯少收穫後播種芸薹萊菔等菜俱爲來春糞田用或取子榨油油餅研作田土肥料又或向撫州涂家埠等處購取紅白花草籽布於田中滋生蕃茂備來年清明後耨而拌之以作本田肥若諸豆雜糧多種於山或旱田難蒔晚禾亦種雜糧耕人田者曰佃授田人耕者曰東按田定租按租定穩租錢亦曰仁禮錢田價日昂租與錢稍增亦有祖父百餘年授耕之田未升租與錢者計田以把或以種蓋指蒔秧及浸種之多少言大約二十五把爲一畝一畝爲種七升半

女工專以縫紉績麻爲事姑率媳母攜女篝燈合作每至宵分間繅野繭紡木棉勞則善心生故閨閣清嚴內外整肅不覲客面卽

至戚來往亦有不出門不踰闕之意近此風漸衰然士夫家猶斤斤有禮法

工役公私興作皆取民間之匠役之而償其值萬載僻在山谷百工不皆全而日用所資亦無缺木石鐵錫皮漆銀銅泥瓦陶篋及設色之工並剃頭皆謂之匠外有受人雇值供耕作及薪水春鑿諸役任一年事者曰長工一月日月工一日曰零工任時士夫家多購僕隸并爲之婚娶長子孫世服其役今則此風漸少

商賈舊志云地居上游溪澗深窄破難鱗次巨艦不得入所有懋遷者惟二三小販近日街市喧填貨物輳集又擁費走數千里外江浙川廣往返尤多其土產之利則以夏布茶油表心紙爲最重然諾通有無闕閭中亦有士君子之行者

飲食糯米釀爲水酒清明及冬至釀者尤勝醕醲者不亞紹興燒酒用占穀釀味特惡茶用大葉皆崇鄉及宜春產崇鄉味較佳新年宴飲幾無虛日價亦倍之比乃競尚武彝僅得下品慕虛名耳燕客舊率從簡遇慶事姻黨畢集近日用海菜而舊姻盡疏矣辛亥以後日趨奢靡大橋改江等處多有茶葉香味亦佳而反以外來爲貴繡以爲鄉土之觀念薄也

衣服舊制云士夫子弟衣冠樸素惟二三游民色服華寫作游冶態甚至胥吏與皂之類相慕成風幾於等威無辨其弊今未盡革而士大夫家因分致飾不華靡亦不寒陋庶幾文質中度光緒以

還衣服麗都所在多有制度載更浮靡之習多中於婦女實未由  
知其所底矣

冠婚冠禮久不行而婚禮則重聘親串作媒論閱通生庚卜吉  
取婦鞋樣至女子十歲之期以釵釧金幣行聘互致庚書謂之接  
親合婚在歲外則隨時行聘娶前二日請媒宴男賓次日具綵輿  
迎娶導以鼓吹厥則壻親迎婦家宴之謂之陪姐夫新婦至預請  
女賓之齊眉多福者扶婦出輿謂之接轎是日宴女賓有送親者  
盛筵以款謂之陪上親送親者俱用男新婦入房後多福者復扶  
婦上堂同夫拜天地祖宗父母舅姑及諸長輩謂之拜茶饗婦設  
筵於廳扶婦當棟坐謂之坐棟晚宴男賓然花燭於堂實前致詞

曰讚燭移燭入房拇戰歡飲新婦肅客乃罷謂之打新房舊志謂  
婚恥索聘此風猶存至匱具則糜費已甚始而富家稍炫其粧繼  
而迭出求勝漸至貧窶效尤典賣以從此則侈靡之宜變者也又  
有童養媳聘金匱具皆省而爲之姑者或輕視虐使可慨也

夫婦人倫大端先王之教刑于寡妻至于兄弟以御于家邦孟子  
嘗曰丈夫生而願爲之有室女子生而願爲之有家不待父母之  
命媒妁之言鑽穴隙相窺踰牆相從則父母國人皆賤之夫相窺  
相從或猶曰羞惡之心非明目張膽可比也昏媾之道與政通人  
之所以異於禽獸者幾希焉耳自戀愛之說盛合者倏離迎者倏  
距父母之命媒妁之言直以爲束縛人生之具古昔聖賢制爲昏

高車鼎一  
媼之禮以立男女之防蓋極之四千年而不變於夷狄者也價買  
生妻人以爲大詬今則一嫁再嫁迄於三四五嫁而若行所無事  
也昏媼之禮廢則夫婦之道苦而淫僻之罪多古不有明戒乎中  
外交通新朝泐湧迂腐之見或未窺法律之精微也戀愛自由羣  
以爲開通而娼妓之驅逐則以爲敗俗傷風暗於彼而明於此是  
尙知人間有羞恥事矣曩見大埠取締異服袖不蔽肘纖欲見肌  
幸其未至於茲土嗚呼吾知其終必至於茲土也跳神之妖妄采  
茶之誨淫至今而遂不改革移風易俗是在賢長官之善爲調護  
也哉

喪禮始歿慎衣衾擇吉而斂擗踊哭泣日夜守柩旁三時上食金  
鼓羅拜將葬訃親友開堂設奠主人裂白布酬賓酒席尙豐腆亦  
不儉其親之意也士夫家少延僧道餘則斲尙齋醮聲容旣類歌  
舞懺悔亦涉誣親積俗成風曾莫之怪至舊志稱惑溺風水火停  
不葬近則奠畢引發隨時安居有異前所云者  
祭禮各族建大祠近日支祠愈多歲時會聚統於所尊清明節子  
姓衣冠集祠相率祭墓而冬至之祭尤重前三日張燈陳器用鼓  
吹滌蕩之祭之前日豫習其儀曰習儀於五鼓行祀禮曰正祭主  
以族之宦達或族長其升降獻酬之節率以朱子家禮爲準祭畢  
布席而俊蓋尊祖敬宗收族之誼胥於是乎在  
祈禳鬼神之說自古有之而信巫者遇病輒延驅祟有說和追魂

釀星拜家書諸名色惟跳神爲最惡而鄉村競尙之又或生辰建醮冀以楮錢豫貯冥庫曰做豫修皆可晒怪者

賽會縣城隍廟新正演戲十日 至四月十八神誕先期月餘梨園紛集士民酬愿無虛日城坊各廟俱賽戲飲宴四月終乃罷其次莫如楮樹潭入九月間歌舞賽神卽以通商餘如高城盧家洲率以五月周陂橋白水率以八月牟村潭準則五月八月兼之又大畚口墟市亦在八月其或修建功竣必募貲戲醮名爲萬人緣此則不拘月數者也又有所謂陽戲心愿者提挈傀儡始爲神繼爲優各家有原演之若夫按月節序如元旦之拜年元宵之張燈花朝之蹈青清明之挂紙端午之競龍舟中元之焚楮錢賞月以中

秋登高以重九祭竈於小阜守歲於除夕率與鄰邑無甚異  
民國例不准畜婢女而縣人之酷待婢女者直犬彘之不如也亦  
地方士紳及良有司之責也

死者以入土爲安必先以入棺爲安縣近稍爲富厚之家死人必  
攤靈床細帳重衾偃息如生人少則三日多則五日惡俗相沿不  
改不獨有礙衛生僧道入門已違喪禮清季有所謂儒醮似道非  
道莫知其非今衰息矣

鴉片之毒流布海內道光朝曾一禁之而其禍轉酷事起於漢人  
而失機於蒲人日積月累栽種多而價廉制錢入文可供一日之  
癮通境烟館達三千家清季與英訂禁至民初已減其八九鄉市

幾於斷絕竹木蔬果偷竊無人此實轉弱而強轉貧而富之一大機不知其何以施而英人亦竟聽之也烟土之由湘輸入者粘貼印花株潭實爲通衢利之所在上下交征而元氣剝喪盡矣與烟相近者曰賭賭具不一三四十年来有所謂麻雀者且以爲娛樂之品夫關於娼寮妓館者孰不以爲娛樂鄉人之稱嗜烟者曰煙鬼嗜賭者曰賭鬼謂其俾晝作夜也流痞不足齒紈綺不足惜而獨無以解於士人儕身庠序夥開棧房抽頭聚賭而煙與娼亦一呼立應光緒中葉不知誤幾許聰明子弟淫靡之習盛而廉恥之念衰爭言戀愛導娼妓之捷徑侈談自由揚娼妓之頹波禁娼禁賭迭有所聞迭有所罰機關把持轉逃於法令之外禁亦少疎而煙禁則日加嚴切截至二十五年違者將有性命之危再展至二十九年必盡絕矣娼賭可以敗家喪身而煙則顯干國紀奉行不力刑法隨之愼毋希冀於萬一也

吳陽樂城晉改名康樂故址在縣東北四十里今羅城按晉武帝改陽樂縣爲康樂縣不聞有遷建事舊志以陽樂卽今縣沿晉改康樂遷治未知何據蓋陽樂城卽康樂城也寰宇記乃云陽樂城在州西北八十里義鈞鄉康樂城在縣東北四里求兩地無蹟記必誤矣明一統志瑞州陽樂城在新昌縣東二十里袁州康樂城在萬載縣東二十里亦誤惟瑞州古蹟注康樂城在府西一百九十里獨得其實今以道里方隅按之其地適當羅城正古康樂鄉康樂里康

樂水在焉今尚有城上西門游門諸地名其爲康樂故城無疑上  
高新昌志各謂其縣有陽樂城蓋爲寰宇記所誤

萬載塲故址在邑西萬載鄉

按唐末立萬載塲其址未知在何處姑以萬載鄉統之

鄆王寨在縣西三十五里湯周山宋靖康間鄉寇雲擾玉聚鄉民

立寨柵舊有石壇今不存韋志府志

按韋志云鄆王寨嘉靖志誤稱燕王寨攷嘉定志已作燕王寨早  
誤

鄆王岳飛土城在縣北三十里三百坵俗稱土城裏

按三百坵土城相傳飛征楊天便道駐此滅土寇高蔡陽等遺蹟

猶存攷建炎紹興間劇賊曹成馬友黨潰寇劉忠張成輩先後據  
萬飛以紹興二年討曹成招降馬友郝通三年而遣王貴擒劉忠  
張成五年入覲奉詔討楊天七年李綱捕虔吉盜飛由襄陽會勦  
見金院編及宋史然則飛之駐此爲親至爲遣屬爲特來爲假道均  
未可定高蔡陽別無可稽想卽據萬餘黨歟

營盤嶺縣西楮樹鎮距廵司署數里世傳岳飛自湖湘往新昌經  
此駐兵清康熙十六年二月遊擊趙應時關彪都司汪國梁搜搗  
賊巢領馬步兵駐此

銀山寨縣南十五里嘉定志

按輿地紀勝循石壁而上洞容數百人避寇者多居之



武功峽縣北一百二十里黎源明萬曆甲戌守備鄧子龍追賊李大鑾楊青山至此破之土人名峽曰破賊又曰武功

謝仙壇邑北七十里謝山靈應觀後謝仲初修真處壇址丹井試劍石及履跡存焉觀側登仙臺飛昇石邑西關外真君井一名卓劍泉又十里竹渡四十里謝仙石一名麻鞋石皆其遺蹟

青陽洞天縣北二十里冠邱山左側兩石並聳高數丈中一隙廣盈尺壁腰橫鐫青陽洞天四字傳爲仙蹟舊志訛作青蓮洞左側舊爲青陽道院邑人敖玉溪建其姪遂初隱此梁寅有青陽歸隱圖記

東蒙峯縣西八十里護富石壁鐫東蒙峯三大字八分書旁小字

德滅僅識道人二字或傳爲張巖書院遺址

獅嵩縣北五里南田峭壁臨淵壁鐫獅嵩二字大盈丈旁有大德元成宗年號二年春月書七字相傳爲仙蹟

趙相蘭相如宅縣西五十里鄉有蘭家村舊志 辨詳寓賢

別駕習鑿齒書堂縣北八十里書堂山山谷深邃相傳別駕讀書處墨池尙存道光七年邑眾重建 本舊志

康樂侯謝靈運讀書堂一在縣北四里地名山峽臺上石硯猶存一在邑東北二里地名廠塘

按靈運食封康樂若嘗至縣集中豈無一字或慕其名而傳其遺蹟乎

孝子廖洪宅在進城鄉嘉定志一云在縣治東果巷興仁坊舊志

陶公石室在縣北東三十里陶家坊平田中突起一巖約高三丈中有石室相傳唐竹溪六逸陶沔晚歲隱此一名陶逸巖俗訛桃花石參寰宇記

南平王鍾傳宅縣北十五里今爲民田前有石筍人稱鍾命公石參洪武志通志府志

按舊志上藍寺卽其遺址考傳素與上藍寺僧往來寺非宅址可知嘉定志謝志宅在州西北化成巖側唐僖宗所賜第有南北二池今遺址與池尚存有別業在萬載江城名蹟記南昌府城崇梵坊唐鍾傳故居今爲永甯寺卽佑清寺旁有娉婷里南平侍兒所居

後以名市林志宅在上高縣西五十里今爲九峯寺傳有畫像在焉蓋傳宅本不一也惟明一統志宅旁有石如筍屹立因呼其地爲石筍阮專指萬載傳係萬產石筍阮實桑梓舊宇南昌特鎮州時所構宜春則賜第上高殆別業歟

太保青陽公宋齊邱宅在縣西三十里懷舊鄉緬村里府志

按洪武志作萱村里地本連都音亦相近舊志作縣北十五里水阮磔則誤矣明一統志齊邱仕南唐拜相乞歸九華山賜號九華先生林志宅在高安縣遼山下安志南昌齊邱兩爲節度使居洪州大起宅名其里曰愛親坊曰錦衣日與賓客讌樂旣而捨爲中宮寺齊邱生長萬載九華遼山南昌皆宦後所宅

刺史李徵古宅在縣西二十里高城市後徙城中安仁坊

按明一統志嘉靖府志均未詳徵古宅里考徐鍇袁州先聖廟記  
敕改所居高侯鄉高城里曰懷舊鄉孕秀里則宅確在高城無疑  
國子祭酒徐鉉讀書處在古福慶坊相傳鉉宦後人食其惠因以  
名坊

劉長者讀書堂在縣北七十里謝山靈應觀左

龍南尹歐陽朝讀書處縣南興賢坊

大史譚觀隱居故址在縣龍河石巖旁以上舊志

尚古堂稅使黃壁建在治東集賢坊有記又建我我亭有詩

澄波堂進士黃盅宅又建書舍吳澄題曰大本堂皆有記

東岐山房黃盅建在東岐鵝鼻峯後水木田疇盤曲中谷有詩今  
稱黃家嶺

雲松嶺縣東北六里涂泉上高教諭胡泰結廬於此有記詳寓賢志

長史龍鐔讀書處縣北十六里鐔嗜佳山水按浙回卜白良之青  
天馬奇峰秀水茂林修竹道士黃朴庵焚修鐔即其址拓之延袤  
數十丈今爲長興寺後人塑朴庵像併鐔主祀焉郡志

華萼堂治東後街布政易節構爲友恭謙樂處

志喜堂侍郎郭瑾得贈父母建以志喜有記

彭觀察讀書處城東岳門樓西名小魯齋廢址猶存

孝子龍以仁廬墓處車溪曰瞻思堂題咏甚多彙有瞻思堂集采

藝文補

畫永書堂建城坊明洪武間長史龍鐔建

左布政易節讀書處治東後街名烏溪書院

侍郎郭瑾讀書處治南名綠陰書屋

給諫劉盡讀書處邑東北二里名桐岡書屋有記

郡守李瓊讀書處邑石頭山亭沼園樹甲於一時

郡丞彭天補讀書處邑北煉石別業以上並舊志

按舊志望嶽樓在東郊外百步可望東嶽祠今廢翠巖亭縣北龍  
江上邑人彭顯建石亭在林家渡邑三尹彭天贊建爲往來憩息  
所明崇禎間廢

清康熙四年邑人王事重建木亭善果亭在黃茅嶺彭立燬建懋  
行者皆古蹟也

按通志龍江亭在縣北獅子山頂府志勞勞亭明知縣陸世勣建  
於筆架山畔按明知縣有陸璣無世勣舊志龍江亭一在龍山頂遊宴  
登眺之所元末燬明正德丁丑知縣張邦穀重立一在龍河水濱  
名龍江駐節亭宦遊應舉於此祖饒明成化間知縣陳璨令邑民  
辛璿創建迎恩亭在治東南二里廂外明洪武十五年知縣李遠  
建迎春亭明隆慶間知縣徐一唯修葺旁立徐祠崇禎間知縣韋  
明傑捐貲重修今並廢

晉陶回丹陽人爲司徒王導司馬蘇峻之役請早出兵守江口峻

將至策峻必向小丹陽南道步來伏兵要之可一戰而擒庾亮不從卒如所料王師敗回還合義軍得千餘人並爲步軍與陶侃溫嶠等并力攻峻又別破韓晃以功封康樂伯官終征虜將軍領軍將軍散騎常侍謚曰威子汪嗣位至輔國將軍宣城內史節晉書本傳

按通志祠廟云利貺廟在高安鳳山祀陶回回封康樂伯咸樂疑咸和之誤中食邑苦旱乃發廩賑濟民利其貺建祠祀之則威公惠在食邑史傳雖畧賴祠廟志而章惟食邑在康樂與今高安無涉攷高安志無所謂鳳山惟有鳳嶺山舊志在治西七十里新志六十里雖距康樂不遠究隔宜豐望蔡境不得謂爲康樂封域也今

康樂里有康樂古祠不名利貺宜改塑像爲木主復利貺之名以誌威公之惠

謝元字幼度時苻堅疆朝廷求可鎮北方者叔父安以元應徵拜建武將軍兗州刺史領廣陵相監江北諸軍事以功封東興侯堅自率兵屯項城號百萬詔以元爲前鋒拒之堅進屯壽陽列陣肥水元軍不得渡乃使謂苻融令稍卻堅衆亂不能止元以精銳入千徑渡戰肥水南堅中流矢臨陣斬融堅衆奔潰投水死者肥爲不流遂經畧舊都兗青冀三魏以次平定加都督徐兗青司冀幽并七州封康樂縣公官終會稽內史追贈車騎將軍開府儀同三司謚獻武子瑗嗣官秘書郎卒子靈運嗣同上

宋謝靈運文章之美江左莫逮襲公封食邑二千戶性奢豪車服器物多改舊制世共宗之咸稱謝康樂仕晉至黃門侍郎高祖受命降爵爲侯食邑五百戶文帝徵爲秘書監遷侍中賞遇甚厚自以才能宜參時政而帝唯以文義見接意不平多稱疾不朝乃賜假歸會稽與太守孟顛構隙顛表其異志靈運詣闕自訴以爲臨川內史在郡游放爲有司所糾司徒遣從事收之興兵叛逸爲詩曰韓亡子房奮秦帝魯連恥本自江海人忠義感君子追討禽之徙付廣州後詔於廣州棄市節宋書本傳

劉秀之字道寶東菟莒人元嘉二十五年除督梁南北秦三州軍事梁南秦二州刺史聞元凶弒逆卽日起兵求率眾赴襄陽事平

遷使持節都督益梁二州甯朔將軍益州刺史義宣家荊州爲逆秀之斬其使遣兵襲江陵斬其將席天生進號征虜改督爲監持節刺史如故以起義功封康樂縣侯食邑六百戶官終使持節散騎常侍都督雍梁南北秦四州竟陵隨二郡諸軍事安北將軍甯蠻校尉雍州刺史追贈侍中司空增封邑爲千戶謚忠成子景遠嗣官至前將軍卒子儻嗣齊受禪國除節宋書本傳

康樂公主修明孝武文穆王皇后生宋書

徐孝嗣字始昌東海郟人八歲襲爵枝江縣公宋孝武甚愛之尙

康樂公主官至齊司空節南齊書本傳

齊李安民蘭陵承人宋明帝論饋口功封邵武縣子仕至左衛將

軍領衛尉太祖卽位封康樂侯邑千戶官終散騎常侍安東將軍  
吳興太守贈鎮東將軍謚曰肅同上

梁侯瑱字伯玉巴南充國人世爲西蜀豪酋侯景亂以超武將軍  
隨鄱陽王範世子入援景敗瑱誅其黨與以應義軍授武臣將軍  
南兖州刺史封鄆縣侯荊州陷衛晉安王還都承制改封康樂縣  
公邑五千戶進號車騎將軍鎮豫章仕陳爲大尉增邑千戶天嘉  
元年改封零陵郡公謚壯肅節陳書本傳

陳陳叔陵字子嵩高宗第二子高宗爲江陵直閣將軍生叔陵江  
陵陷高宗遷關右其還也以後主及叔陵爲質天嘉三年隨後主  
還朝封康樂縣侯邑五百戶大建元年封始興王奉昭烈王祀高

宗崩爲逆蕭摩訶馬客斬之同上

林馮世祖時討陳寶應尙書下符有曰持節通直散騎常侍壯武  
將軍定州刺史康樂縣開國侯林馮見陳寶應傳

唐鍾傳封南平王

南唐宋齊邱封楚國公

按宋楚國公陸游馬令南唐書各有本傳出處更爲詳悉惟一作  
豫章人一作廬陵人俱誤攷朱子綱目質實云齊邱萬載人通志  
引南唐書及江南通志揚州府志俱云萬載而郡邑志又確載緬  
村故宅且崇祀鄉賢其爲邑人無疑至南昌令公園清逸樓又公  
鎮南昌時所僑居也其事蹟散見通鑑綱目鈞磯立談五代史吳

春秋南唐春秋西溪叢語江南錄十國紀年江南野史南漢春秋  
全唐詩春秋拾遺西江詩話五國故事五代史補冊府元龜江表  
志南唐近事續前定錄宋史藝文志鄭通志藝文畧江南野錄者  
不勝採錄馬書於禪代之際事多詆毀陸書加以微辭十代文獻  
畧辦之甚明晰而通鑑綱目容齋隨筆引吳唐拾遺錄所載丁口  
錢計畝錢事請抬絹綢綿價蠲除丁課不十年間野無閒田桑無  
隙地自吳唐至宋民受其賜實公生平政績惠民之大者馬陸二  
書不載縣府志亦未詳特撮其要以補之

